

四庫全書

經部

欽定四庫全書

經部

孟子集疏卷十二至

詳校官大理寺卿臣富炎恭

刑部郎中臣許兆椿覆勘

總校官進士臣朱鈐

校對官中書臣朱烜

謄錄監生臣王時發

欽定四庫全書

孟子集疏卷十二

宋 蔡模 撰

告子章句下

凡十  
六章

任人有問屋廬子曰禮與食孰重曰禮重

任平聲○任國名屋廬子

名連孟子弟子也

色與禮孰重

任人復問也

曰禮重曰以禮食則飢

而死不以禮食則得食必以禮乎親迎則不得妻不親

迎則得妻必親迎乎

迎去聲

屋廬子不能對明日之鄒以

告孟子孟子曰於答是也何有

於如字○何有不難也

不揣其本

而齊其末方寸之木可使高於岑樓

揣初委反○本謂下末謂上方寸之

木至卑喻食色岑樓樓之高銳似山者至高喻禮若不取其下之平而升寸木於岑樓之上則寸木反高岑樓反卑

金重於羽者豈謂一鉤金與一輿羽之謂哉

鉤帶也

金本重而帶鉤小故輕喻禮有輕於食色者羽木輕而一輿多故重喻食色有重於禮者

取食之重

者與禮之輕者而比之奚翅食重取色之重者與禮之

輕者而比之奚翅色重

翅與音同古字通用施智反○禮食親迎禮之輕者也飢而死

以滅其性不得妻而廢人倫食色之重者也奚翅猶言何但言其相去懸絕不但有輕重之差而已

往應

之曰紵兄之臂而奪之食則得食不紵則不得食則將



紛之乎踰東家牆而摟其處子則得妻不摟則不得妻

則將摟之乎

紛音軫摟音婁○紛戾也摟牽也處子處女也此二者禮與食色皆其重者而以之

相較則禮為尤重也○此章言義理事物其輕重固有  
大分然於其中又各自有輕重之別聖賢於此錯綜斟  
酌毫髮不差固不肯枉尺而直尋亦未嘗膠柱而調瑟  
所以斷之一視於理之當然而已矣○集疏曰或問首  
章之說朱子曰禮之大體固重於食色矣然其間事之  
大小緩急不同則亦或有反輕於食色者惟理明義精  
者為能權之而不失耳權之不失是乃所以全禮之重  
而深明食色之輕也觀於寸木鉤金之喻孟子之意亦  
可見矣又曰親迎則不得妻不親迎則得妻如古者國  
有凶荒則殺禮而昏周禮荒政十二條中亦有此法蓋  
貧窮不能備親迎

○曹交問曰人皆可以為堯舜有諸

之禮法許如此

孟子曰然

趙氏曰曹交曹君之弟也人皆可以為堯舜疑古語或孟子所嘗言也

交聞文

王十尺湯九尺今交九尺四寸以長

句

食粟而已如何

則可

曹交問也食粟而已言無他材能也

曰奚有於是亦為之而已矣有

人於此力不能勝一匹雛則為無力人矣今曰舉百鈞

則為有力人矣然則舉烏獲之任是亦為烏獲而已矣

夫人豈以不勝為患哉弗為耳

勝平聲○四字本作鳴鴨也從省作匹禮記說

匹為驚是也烏獲古之有力人也能舉移千鈞

徐行後長者謂之弟疾行先長

者謂之不弟夫徐行者豈人所不能哉所不為也堯舜

之道孝弟而已矣

後去聲長上聲先去聲夫音扶○陳氏曰孝弟者人之良知良能自然之

性也堯舜人倫之至亦率是性而已豈能加毫末於是哉楊氏曰堯舜之道大矣而所以為之乃在夫行止疾徐之間非有甚高難行之事也百姓蓋日用而不知耳子服堯之服誦堯之言行

堯之行是堯而已矣子服桀之服誦桀之言行桀之行

是桀而已矣

之行並去聲○言為善為惡皆在我而已詳曹交之問淺陋麤率必其進見之時禮

貌衣冠言動之間多不循理故孟子告之如此兩節云

曰交得見於鄒君可以假

館願留而受業於門

見音現○假館而後受業又可見其求道之不篤

曰夫道

若大路然豈難知哉人病不求耳子歸而求之有餘師

夫音扶○言道不難知若歸而求之事親敬長之間則性分之內萬理皆備隨處發見無不可師不必留此而受業也○曹交事長之禮既不至求道之心又不篤故孟子教之以孝弟而不容其受業蓋孔子餘力學文之意亦不屑之教誨也○集疏曰朱子曰堯舜之道孝弟而已矣這只是對那不孝不弟底說孝弟便是堯舜之道不孝不弟便是桀紂孟子此段發意如此大却只在徐行後長上面要知工夫須自理會只在此不是別人干預得底事曹交識致凡下又有挾貴求安之意故孟子拒之然所以告之者亦極親切非終拒之也使其因此明辨力行而自得之則孟子之發已也深矣顧交必不能耳或問程子曰聖人之道知之甚難程子曰仲尼但曰未之思也夫何遠之有此言極有涵蓄意思孟子言夫道若大路然豈難知哉豈字便露筋骨下面說人病不求耳子歸而求之有餘師這數句却說得好張子曰徐行折枝之類孟子姑舉其易者言之推此則事

無鉅細莫不自天德至纖至悉至實處出也或問此章之說曰程張至矣張子發明言外之旨尤為有功曰學莫難於知道故欲修身者必以致知為先今曰道豈難知而特患於不為何哉曰道之精微固難知也然自始學言之則如是而為孝如是而為弟如是而為不孝如是而為不弟其大體向背之間豈不明而易知乎致知云者亦曰即其已行之知而推致之耳今曹交於此似有所未知借曰知之亦未必能行之也亦何暇及乎致知之方乎模謂孟子以人皆可為堯舜所以誘曹交之進也然亦豈謂不假修為而即可為堯舜邪勉之以孝弟又勉之以衣服言行之間固不以難而沮人亦不以易而許人惜乎曹交之不足以進此也○公孫

丑問曰高子曰小弁小人之詩也孟子曰何以言之曰

怨

弁音盤○高子齊人也小弁小雅篇名周幽王娶申后生太子宜臼又得褒姒生伯服而黜申后廢宜臼

於是宜白之傳為作此詩以叙其哀痛迫切之情也

曰固哉高叟之為詩也有人

於此越人關弓而射之則已談笑而道之無他疏之也

其兄關弓而射之則已垂涕泣而道之無他戚之也小

弁之怨親親也親親仁也固矣夫高叟之為詩也

關與

射食亦反夫音扶○固謂執滯不通也為猶治也越蠻夷國名道語也親親之心仁之發也

曰凱風

何以不怨

凱風邶風篇名衛有七子之母不能安其室七子作此以自責也

曰凱風親

之過小者也小弁親之過大者也親之過大而不怨是

愈疏也親之過小而怨是不可磯也愈疏不孝也不可

礮亦不孝也

礮音機○礮水激石也不可礮言微激之而連怒也

孔子曰舜其至

孝矣五十而慕

言舜猶怨慕小弁之怨不為不孝也○趙氏曰生之膝下一體而分喘息呼吸

氣通於親當親而疏怨慕號天是以小弁之怨未足為怨也○集疏曰或問程子論小弁之怨與舜不同何也曰舜之怨曰父母之不我愛於我何哉蓋反諸身以求其所未至之辭小弁之怨曰何辜於天我罪伊何則自以為無罪矣此其所以不同也歟又曰作小弁者自是未到得舜地位蓋亦常人之情耳只我罪伊何上面說何辜於天亦一似自以為無罪未可與舜同日語也○宋惲將之楚孟子遇於石

丘

惲口莖反○宋姓惲名石丘地名

曰先生將何之

趙氏曰學士年長者故謂之先生

曰吾聞秦楚構兵我將見楚王說而罷之楚王不悅我

將見秦王說而罷之二王我將有所遇焉

說音稅○時宋脛方欲見

楚王恐其不悅則將見秦王也遇合也按莊子書有宋鉏者禁攻寢兵救世之戰上說下教強聒不舍疏云齊宣王時人以事考之疑即此人也曰軻也請無問其詳願聞其指說之

將何如曰我將言其不利也曰先生之志則大矣先生

之號則不可

徐氏曰能於戰國擾攘之中而以罷兵息民為說其志可謂大矣然以利為名則不

可也先生以利說秦楚之王秦楚之王悅於利以罷三軍

之師是三軍之士樂罷而悅於利也為人臣者懷利以

事其君為人子者懷利以事其父為人弟者懷利以事



其兄是君臣父子兄弟終去仁義懷利以相接然而不

亡者未之有也

樂音洛下同

先生以仁義說秦楚之王秦楚

之王悅於仁義而罷三軍之師是三軍之士樂罷而悅

於仁義也為人臣者懷仁義以事其君為人子者懷仁

義以事其父為人弟者懷仁義以事其兄是君臣父子

兄弟去利懷仁義以相接也然而不王者未之有也何

必曰利

王去聲○此章言休兵息民為事則一然其心有義利之殊而其效有興亡之異學者所當深

察而明辨之也○集疏曰模按此章與首篇首章相為表裏見得孟子凜乎義利之辨其嚴如此宋程在當時

想亦是年德之高者故孟子以先生呼之而猶不免溺於利害之私蹊不知仁義之正道世俗從可知矣○

孟子居鄒季任為任處守以幣交受之而不報處於平

陸儲子為相以幣交受之而不報

任平聲相去聲下同○趙氏曰季任任君

之弟任君朝會於鄰國季任為之居守其國也儲子齊相也不報者來見則當報之但以幣交則不必報也

他日由鄒之任見季子由平陸之齊不見儲子屋廬子

喜曰連得聞矣

屋廬子知孟子之處此必有義理故喜得其間隙而問之

問曰夫子

之任見季子之齊不見儲子為其為相與

為其之為去聲下同與平

聲○言儲子但為齊相不若季子攝守君位故輕之邪曰非也書曰享多儀儀不

及物曰不享惟不役志于享

書周書洛誥之篇享奉上也儀禮也物幣也役用也

言雖享而禮意不及其幣則是

不享矣以其不用志於享故也

為其不成享也

孟子釋書意如

此屋廬子悅或問之屋廬子曰季子不得之鄒儲子得

之平陸

徐氏曰季子為君居守不得往他國以見孟子則以幣交而禮意已備儲子為齊相可以至齊

之境內而不來見則雖以幣交而禮意不及其物也○集疏曰朱子曰儲子初不自來但以幣交未為非禮但孟子既受之後便當來見而又不來則其誠之不至可知矣故孟子過而不見施報之宜也亦不屑之教誨也或問儲子儀不及物幣可反乎曰始交未容逆料其不誠既受則不可反矣模倣此章見孟子於禮意之間是

否之際權衡輕重各稱其宜如此然皆以幣交而皆受之豈孟子當時亦有幣交之禮而季子儲子皆非惡人

而亦有可受之理歟

○淳于髡曰先名實者為人也後名實者自

為也夫子在三卿之中名實未加於上下而去之仁者

固如此乎

先後為皆去聲○名聲譽也實事功也言以名實為先而為之者是有志於救民也以名

實為後而不為者是欲獨善其身者也名實未加於上下言上未能正其君下未能濟其民也

孟子曰

居下位不以賢事不肖者伯夷也五就湯五就桀者伊

尹也不惡汙君不辭小官者柳下惠也三子者不同道

其趨一也一者何也曰仁也君子亦仁而已矣何必同

惡趨並去聲○仁者無私心而合天理之謂楊氏曰伊尹之就湯以三聘之勤也其就桀也湯進之也湯豈有

伐桀之意哉其進伊尹以事之也欲其悔過遷善而已  
伊尹既就湯則以湯之心為心矣及其終也人歸之天  
命之不得已而伐之耳若湯初求伊尹即有伐桀之心  
而伊尹遂相之以伐桀是以取天下為心也以取天下  
為心豈聖人之事哉曰魯繆公之時公儀子為政子柳子思為臣

魯之削也滋甚若是乎賢者之無益於國也

公儀子名休為魯相

子柳泄柳也削地見侵奪也髡譏孟子雖不去亦未必能有為也

曰虞不用百里奚而

亡秦穆公用之而霸不用賢則亡削何可得與

與平聲○百里

奚事見前篇

曰昔者王豹處於淇而河西善謳絲駒處於高

唐而齊右善歌華周杞梁之妻善哭其夫而變國俗有

諸內必形諸外為其事而無其功者髡未嘗覩之也是

故無賢者也有則髡必識之

華去聲○王豹衛人善詠淇水名絲駒齊人善歌高

唐齊西邑華周杞梁二人皆齊臣戰死于莒其妻哭之哀國俗化之皆善哭髡以此譏孟子事齊無功未足為

賢也曰孔子為魯司寇不用從而祭燔肉不至不稅冕而

行不知者以為為肉也其知者以為為無禮也乃孔子

則欲以微罪行不欲為苟去君子之所為衆人固不識

也稅音脫為肉為無之為並去聲○按史記孔子為魯司寇攝行相事齊人聞而懼於是以女樂遺魯君季

桓子與魯君往觀之怠於政事子路曰夫子可以行矣孔子曰魯今且郊如致膳於大夫則吾猶可以止桓子

卒受齊女樂郊又不致膳俎于大夫孔子遂行孟子言  
以為為肉者固不足道以為為無禮則亦未為深知孔  
子者蓋聖人於父母之國不欲顯其君相之失又不欲  
為無故而苟去故不以女樂去而以膳肉行其見幾明  
決而用意忠厚固非衆人所能識也然則孟子之所為  
豈髡之所能識哉○尹氏曰淳于髡未嘗知仁而未嘗  
識賢也宜乎其言若是○集疏曰程子曰五就湯五就  
桀此伊尹後來事蓋已出了則當以湯之心為心所以  
五就桀不得不如此張子曰伯夷伊尹柳下惠皆稱聖人莫非仁也○孟子曰五霸者三

王之罪人也今之諸侯五霸之罪人也今之大夫今之

諸侯之罪人也趙氏曰五霸齊桓晉文秦穆宋襄楚莊也三王夏禹商湯周文武也丁氏曰夏

昆吾商大彭豷韋周天子適諸侯曰巡狩諸侯朝於天

子曰述職春省耕而補不足秋省斂而助不給入其疆  
土地辟田野治養老尊賢俊傑在位則有慶慶以地入  
其疆土地荒蕪遺老失賢培克在位則有讓一不朝則  
貶其爵再不朝則削其地三不朝則六師移之是故天  
子討而不伐諸侯伐而不討五霸者樓諸侯以伐諸侯  
者也故曰五霸者三王之罪人也

朝音潮辟與闕同治平聲○慶賞也蓋其

地以賞之也培克聚斂也讓責也移之者誅其人而變  
置之也討者出命以討其罪而使方伯連帥帥諸侯以  
伐之也伐者奉天子之命聲其罪而伐之也樓牽也五  
霸牽諸侯以伐諸侯不用天子之命也自入其疆至則



有讓言巡狩之事自一不朝至六師移之言述職之事

五霸桓公為盛葵丘之會

諸侯束牲載書而不歆血初命曰誅不孝無易樹子無以妾為妻再命曰尊賢育才以彰有德三命曰敬老慈幼無忘賓旅四命曰士無世官官事無攝取士必得無專殺大夫五命曰無曲防無遏糴無有封而不告曰凡我同盟之人既盟之後言歸于好今之諸侯皆犯此五禁故曰今之諸侯五霸之罪人也

軟所洽反糴音狄好去聲○按春秋傳僖

公九年葵丘之會陳牲而不殺讀書加於牲上壹明天子之禁樹立也已立世子不得擅易初命三事所以修

身正家之要也賓賓客也旅行旅也皆當有以待之不可忽忘也士世祿而不世官恐其未必賢也官事無攝當廣求賢才以充之不可以闕人廢事也取士必得必得其人也無專殺大夫有罪則請命于天子而後殺之也無曲防不得曲為隄防壅泉激水以專小利病鄰國也無遏糴鄰國凶荒不得閉糴也無有封而不告者不得專封國邑而不告天子也

長君之惡其罪小逢君之惡其罪大今之大夫皆逢君之惡故曰今之大夫今之諸侯之罪人

也長上聲○君有過不能諫又順之者長君之惡也君之過未萌而先意導之者逢君之惡也○林氏曰邵子有言治春秋者不先治五霸之功罪則事無統理而不得聖人之心春秋之間有功者未有大於五霸有過者亦未有大於五霸故五霸者功之首罪之魁也孟子此章之義其亦若此也與然五霸得罪於三王今之諸

侯得罪於五霸皆出於異世故得以逃其罪至於今之  
大夫宜得罪於今之諸侯則同時矣而諸侯非惟莫之  
罪也乃反以為良臣而厚禮之不  
以為罪而反以為功何其繆哉 ○魯欲使慎子為將

軍

慎子魯臣

孟子曰不教民而用之謂之殃民殃民者不容

於堯舜之世

教民者教之禮義使知入事父兄出事長上也用之使之戰也

一戰勝齊

遂有南陽然且不可

是時魯蓋欲使慎子伐齊取南陽也故孟子言就使慎子善戰有功

如此且猶不可

慎子勃然不悅曰此則滑釐所不識也

滑音骨滑釐

慎子名

曰吾明告子天子之地方千里不千里不足以待

諸侯諸侯之地方百里不百里不足以守宗廟之典籍

待諸侯謂待其朝覲聘問之禮  
宗廟典籍祭祀會同之常制也

周公之封於魯為方百

里也地非不足而儉於百里太公之封於齊也亦為方

百里也地非不足也而儉於百里

二公有大勲勞於天下而其封國不過百

里儉止而不過之意也

今魯方百里者五子以為有王者作則魯

在所損乎在所益乎

魯地之大皆併吞小國而得之有王者作則必在所損矣

徒取

諸彼以與此然且仁者不為況於殺人以求之乎

徒空也言

不殺人而取之也

君子之事君也務引其君以當道志於仁而

已

當道謂事合於理志仁謂心在於仁○集疏曰問王制與孟子同而周禮諸公之地封疆方五百里諸侯

方四百里伯三百里子二百里男百里鄭氏以王制為  
夏商制謂夏商中國方三千里周公斥而大之中國方  
七千里所以不同曰鄭氏只文字上說得好看來甚不  
曉事情且如百里之地周人欲增到五百里須併四箇  
百里國地方做得一國其所併四國又當別列地以封  
之如此則天下諸侯東遷西移改立宗廟社稷皆為之  
騷然也竊意其初只方百里後來吞併遂漸漸大如禹  
會諸侯於塗山執玉帛者萬國到周時只千八百國自  
非吞併如何不見許多國武王時諸國地已大武王亦  
不奈何只得就而封之當時封許多功臣百里之國緣  
當初滅國者五十得許多空地可封不然則周公太公  
亦自無安頓處若割取諸國之地則寧不謀反如漢龜  
錯之時乎然則孟子百里之說亦只是大綱如此說不  
曾實考見得古制范氏曰君子之事上也引其君於正  
小人之事上也引其君於邪君子引其君於仁義引其  
君於愛民引其君於聽諫引其君於恭儉引其君於學

問此君子之所以引其君者志於仁而已矣小人引其君於好利引其君於好戰引其君於用刑引其君於拒諫引其君於驕侈小人所以引其君者志於不仁而已矣伊尹以堯舜之道引成湯故成湯為堯舜之君周公以文武之道引成王故成王為文武之君此引其君以當道榮夷公以專利引周厲王故周亂趙高以刑法引秦二世故秦亡此

○孟子曰今之事君者曰我能為君

辟土地充府庫今之所謂良臣古之所謂民賊也君不

鄉道不志於仁而求富之是富桀也

為去聲辟與闕同鄉與向同下皆同

○辟闕

我能為君約與國戰必克今之所謂良臣古之

所謂民賊也君不鄉道不志於仁而求為之強戰是輔

桀也

約要結也與國和好相與之國也

由今之道無變今之俗雖與之

天下不能一朝居也

言必爭奪而至於危亡也○集疏曰朱子曰鄉道志仁不可分為二

事中庸曰脩道以仁孟子言不志於仁所以釋上文不鄉道之實也前章務引其君以當道志於仁而已亦言

志仁之為當道爾

○白圭曰吾欲二十而取一何如

白圭名丹周人也欲

更稅法二十分而取其一分林氏曰按史記白圭能薄飲食忍者欲與童僕同苦樂樂觀時變人棄我取人取我與以此居積致富其為此

孟子曰子之道貉道也

貉音

貉○貉北方夷狄之國名也

萬室之國一人陶則可乎曰不可器不

足用也

孟子設喻以詰圭而圭亦知其不可也

曰夫貉五穀不生惟黍生

之無城郭宮室宗廟祭祀之禮無諸侯幣帛饗飮無百

官有司故二十取一而足也

夫音扶○北方地寒不生五穀黍早熟故生之饗飮

以飲食饋客之禮也

今居中國去人倫無君子如之何其可也

無君

臣祭祀交際之禮是去人倫無百官有司是無君子

陶以寡且不可以為國況無

君子乎

因其辭以折之

欲輕之於堯舜之道者大貉小貉也欲

重之於堯舜之道者大桀小桀也

什一而稅堯舜之道也多則桀寡則貉今

欲輕重之則是小貉小桀而已

○白圭曰丹之治水也愈於禹

趙氏曰當時諸

侯有小水白圭為之築隄壅而注之他國

孟子曰子過矣禹之治水水之道



也順水之性也是故禹以四海為壑今吾子以鄰國為壑壑受

水處也水逆行謂之洚水洚水者洪水也仁人之所惡也

吾子過矣惡去聲○水逆行者下流壅塞故水逆流今乃壅水以害人則與洪水之災無異矣○

孟子曰君子不亮惡乎執惡平聲○亮信也與諒同惡乎執言凡事苟且無所執持

也○集疏曰或問亮之為義朱子曰與謀通者近之諒有二訓有止訓信者友諒之類是也有為必信者貞而不諒是也程子張子皆以諒為必信而以諒執為病竊謂執無可病之理故吾以是推之而從尹氏之說直以為友諒之諒言君子舍是則無可據守也○魯欲使樂正子為政孟子曰吾

聞之喜而不寐喜其道之得行公孫丑曰樂正子強乎曰否有

知慮乎曰否多聞識乎曰否

知去聲○此三者皆當世之所尚而樂正子之所短

故丑疑而歷問之

然則奚為喜而不寐

丑問也

曰其為人也好善

好去聲下同

好善足乎

丑問也

曰好善優於天下而況魯國乎

優有餘裕也言雖治天下尚有餘力也

夫苟好善則四海之內皆將輕千

里而來告之以善

夫音扶下同○輕易也言不以千里為難也

夫苟不好善

則人將曰訑訑予既已知之矣訑訑之聲音顏色距人

於千里之外士止於千里之外則讒諂面諛之人至矣

與讒諂面諛之人居國欲治可得乎

訑音移治去聲○訑訑自足其智不

者善言之貌君子小人迭為消長直諒多聞之士遠則  
讒諂面諛之人至理勢然也○此章言為政不在於用  
一己之長而貴於有以來天下之善○陳子曰古之君子何如則仕孟子

曰所就三所去三

其目在下

迎之致敬以有禮言將行其言

也則就之禮貌未衰言弗行也則去之

所謂見行可之仕若孔子於季

桓子是也受女樂而不朝則去之矣

其次雖未行其言也迎之致敬以有

禮則就之禮貌衰則去之

所謂際可之仕若孔子於衛靈公是也故與公遊於圃公

仰視蜚鴈而後去之

其下朝不食夕不食飢餓不能出門戶君聞

之曰吾大者不能行其道又不能從其言也使飢餓於

我土地吾恥之周之亦可受也免死而已矣

所謂公養之仕也君

之於民固有周之之義況此又有悔過之言所以可受然未至於飢餓不能出門戶則猶不受也其曰免死而已則其所受亦有節矣○集疏曰朱子讀疑孟辨曰孟子言所就三所去三其上以言之行不行為去就此仕之正也其次以禮貌衰未衰為去就又其次至於不得已而受其賜則豈君子之本心哉蓋當是時舉天下莫能行吾言矣則有能接我以禮貌而周我之窮困者豈不善於彼哉是以君子以為猶可就也然孟子蓋通上下言之若君子之自處則在所擇矣孟子於其受賜之節又嘗究言之曰飢餓不能出門戶則周之亦可受也明未至於如是之貧則不可受免死而已矣言受之有限不求贏餘明不多受以是而觀則溫公可以無疑於矣孟子

○孟子曰舜發於畎畝之中傅說舉於版築之間

膠鬲舉於魚鹽之中管夷吾舉於士孫叔敖舉於海百

里奚舉於市

說音悅○舜耕歷山三十登庸說築傅巖武丁舉之膠鬲遭亂鬻販魚鹽文王舉之

管仲囚於士官桓公舉以相國孫叔敖隱處海濱楚莊王舉之為令尹百里奚事見前篇故天將降

大任於是人也必先苦其心志勞其筋骨餓其體膚空

乏其身行拂亂其所為所以動心忍性曾益其所不能

曾與增同○降大任使之任大事也若舜以下是也空窮也乏絕也拂戾也言使之所為不遂多背戾也動心忍性謂竦動其心堅忍其性也然所謂性亦指氣稟食色而言耳程子曰若要熟也須從這裏過人恒

過然後能改困於心衡於慮而後作徵於色發於聲而

後喻

衡與橫同○恒常也猶言大率也橫不順也作奮起也微驗也喻曉也此又言中人之性常必有過

然後能改蓋不能謹於平日故必事勢窮蹙以至困於心橫於慮然後能奮發而興起不能燭於幾微故必事理暴著以至驗於人之色發於人則無法家拂士出則人之聲然後能警悟而通曉也

無敵國外患者國恒亡

拂與弼同○此言國亦然也法家法度之世臣也拂士輔弼之

也賢士然後知生於憂患而死於安樂也

樂音洛○以上文觀之則知人

之生全出於憂患而死亡由於安樂矣○尹氏曰言困窮拂鬱能堅人之志而熟人之仁以安樂失之者多矣○集疏曰朱子曰動心者動其仁義禮智之心忍性者忍其聲色臭味之性又曰程子謂若要熟也須從這裏過者只是要事事經歷過似一條路須每日從上面往來行得熟了方認得許多險阻去處若素不曾行忽然

一旦撞行取去少間定墮坑落塹去也困心衡慮徵色發聲謂人之有過而能改者如此困心衡慮者心覺其有過徵色發聲者其過形於外也黃氏云貧賤憂戚是人之所惡也聖賢之論乃獨以是為進德之地何哉恐懼修省常生於憂患驕奢淫佚必起於宴安當窮困踣之餘其操心危其慮患深其刻厲奮發以進於善有不期而然者矣天地之間有陰則有陽有晝則有夜禍福吉凶貧富貴賤死生憂樂之變二者常相對而不能以偏無也人生其間隨所賦受蓋有一定而不可易者與其戚戚於貧賤而卒不能以自免孰若因其所遇而反以成吾德邪是以古之君子有以義命之當然而安之者貧而無諂是也有以義理之可貴而忘之者不改其樂是也有以為天將降大任於我而反以為進德之地者孟子之言是也其處之者若是故其胸中泰然一毫外物不能為之累顏淵原憲之貧一簞之食百結之衣可謂極矣惟知聖道之可樂而不知吾身之為貧後

之學者其貧且賤未必如顏淵原憲之甚也少不如意志氣消沮卑辱苟賤靡所不為不能進德而反以敗德不能遠辱而重以取辱聞孟子之言亦可以釋然而悟幡然而改矣○孟子曰教亦多術

矣予不屑之教誨也者是亦教誨之而已矣

多術言非一端屑潔

也不以其人為潔而拒絕之所謂不屑之教誨也其人若能感此退自修省則是亦我教誨之也○尹氏曰言或抑或揚或與或不與各因其才而篤之無非教也○集疏曰趙氏曰屑潔也考孟子不屑就與不屑不潔之言屑字皆當作潔字解所謂不屑之教誨者當謂不以其人為潔而教誨之如坐而言不應隱几而卧之類

孟子集疏卷十二



欽定四庫全書

孟子集疏卷十三

宋 蔡模 撰

盡心章句上

凡四十  
六章

孟子曰盡其心者知其性也知其性則知天矣

心者人之神明

所以具衆理而應萬事者也性則心之所具之理而天又理之所從以出者也人有是心莫非全體然不窮理則有所蔽而無以盡乎此心之量故能極其心之全體而無不盡者必其能窮夫理而無不知者也既知其理則其所從出亦不外是矣以大學之序言存其心養其性知性則物格之謂盡心則知至之謂也存其心養其性所以事天也存謂操而不舍養謂順而不害事則奉承而不違也殀壽不貳修

身以俟之所以立命也

夭壽命之短長也貳疑也不貳者知天之至修身以俟死則事

天以終身也立命謂全其天之所付不以人為害之○程子曰心也性也天也一理也自理而言謂之天自稟受而言謂之性自存諸人而言謂之心張子曰由太虛有天之名由氣化有道之名合虛與氣有性之名合性與知覺有心之名愚謂盡心知性而知天所以造其理也存心養性以事天所以履其事也不知其理固不能履其事然徒造其理而不履其事則亦無以有諸己矣知天而不以夭壽貳其心智之盡也事天而能修身以俟死仁之至也智有不盡固不知所以為仁然智而不仁則亦將流蕩不法而不足以為智矣○集疏曰或問心無限量者也此其言盡心何也朱子曰心之體無所不統而其用無所不周者也今窮理而貫通以至於可以無所不知則固盡其無所不統之體無所不周之用矣是以平居靜處虛明洞達固無毫髮疑慮存於胷中

至於事至物來則雖舉天下之物或素所未嘗接於耳目思慮之間者亦無不判然迎刃而解此其所以為盡心而所謂心者則固未嘗有限量也大概此章所謂盡心者物格知至之事曾子所以一唯而無疑於夫子之言者是也所謂事天者誠意正心修身之事曾子所以臨深履薄而無日不省其身者是也所謂立命者如是以沒身焉曾子所以得正斃而無求者是也以其推之以一章之指畧可見矣曰然則心之為物與其盡之方奈何曰由窮理致知積累其功以至於盡心則心之體用在我不必先事揣量著意想像而別求所以盡之也曰然則存心養性之說可得聞乎曰存心者氣不逐物而常守其至正也養性者事必循理而不害其本然也又曰盡其心只是窮盡其在心之理性情與心固是一理然命之以心却似包著性情在裏面故孟子語意似說盡其心者以其知性故也又曰心性本不可分況其語脈是盡其心者知其性心只是包著這道理盡知

得其性之道理便是盡其心此句文義與得其民者得其心也相似性者吾心之實理若不知得却盡箇恁又曰盡其心者知其性也知其性則知天矣言人能盡其心則是知其性能知其性則知天也蓋天者理之自然而人之所由以生者也性者理之全體而人之所得以生者也心則人之所以主於身而具是理者也天大無外而性稟其全故人之本心其體廓然亦無限量惟其措於形氣之私滯於聞見之小是以有所蔽而不盡人能即事即物窮究其理至於一日會通貫徹而無所遺焉則有以全其本然之體而吾之所以為性與天之所以為天者皆不外此而一以貫之矣問盡心只是知得盡未說行否曰初間亦只謂知得盡如大學知至未說及行後來子細看如大學誠意一般蓋所謂盡心者言心之所存更無一毫不盡好善便如好好色惡惡便如惡惡臭徹底如此無少虛偽不實如所謂盡心力而為之又曰君子說知性是知得性中物事須知得盡方始

是盡心存其心養其性方始是做工夫處如大學既物  
格而后知至物格者物理之極處無不到知性也知至  
者吾心之所知無不盡盡心也至於意誠則存其心養  
其性也又曰存心非別去尋一物來存孔子云居處恭  
執事敬與人忠便是存心之法又云存之養之便是事  
心性處便是天故曰所以事天也殀壽不貳不以生死  
為吾心之欣戚也殀壽不貳是不疑他若一日未死一  
日要是當百年未死百年要是當這便是立命既不以  
殀壽貳其心又須修身以俟方始能立命殀壽不貳便  
是知性知天之力修身以俟便是存心養性之功立命  
一句更須通下章看西銘都相貫穿問集註所引張子  
語曰本只是一箇太虛漸漸細分說得密耳又曰橫渠  
言大率有未瑩處有心則自有知覺又何合性與知覺  
之有橫先君子答學者曰橫渠四語只是理氣二字而  
細分之由太虛有天之名即無極而太極之謂以理而  
言也由氣化有道之名即一陰一陽之謂道之謂以氣

而言也。合虛與氣有性之名。即繼之者善成之者性之。謂以人物稟受而言也。合性與知覺有心之名。即人心道心之謂。以心之體而言也。但知覺字與心字相迫近。不如人字分別得明白耳。故先師有未瑩之疑。橫謂孟子此章與大學中庸相表裏。盡心如大學之誠意知性如大學之致知知天如大學之知止而盡心知性以知天所以窮其理。即中庸所謂智也。存心養性以事天所以履其事。即中庸所謂仁也。殀壽不貳修身以俟之。所以立命而不渝。即中庸所謂勇也。問謂盡心言其心之所存。更無一毫之不盡也。好善便如好好色。惡惡便如惡惡臭。徹底如此。無少虛偽不實。如所謂盡心力而為之。然若要盡得。須先知得。所以學者要先致知。要光明善要。先窮理。既致其知之至。既明其善之本。既窮其理之極。則天之所以為天者。亦不外是矣。此知性知天。即中庸之所謂智。存謂操而不舍。如居處恭。執事敬。與人忠。便是存心之法。養謂順而不害。如戒慎乎其所不睹。

恐懼乎其所不聞便是所以養性事謂奉承而不違如  
存吾順事沒吾寧也便是所以事天但存之養之又便  
是事心與性又便是天非有二也此存心養性以事天  
即中庸之所謂仁知天而能不以死壽貳其心此可見  
其智之盡事天而能修身以俟死此可見其仁之至以  
此而立命則全其天之所付無一毫人欲之私以害之  
此即中庸之所謂勇也隆山李道傳駁陳武所撰楊文  
靖公傳議曰傳中所斥能知性則能盡心為講之不精  
者朱先生孟子集註說也孟子曰盡其心者知其性也  
知其性則知天矣舊說謂盡心則知性知性則知天前  
輩皆從之而朱先生異焉蓋先生說經務得聖賢本意  
故舊說雖善而考之文義有所不協則弗從以為非聖  
賢當時立言之本意也使孟子此章信如舊說當云盡  
其心則知其性矣知其性則知天矣然後文義相協今  
乃不然一反一覆固已不同復以盡心知性兩句語勢  
觀之則上輕而下重正與失其民者失其心也相類以

彼證此其意尤明故先生別按本文更定今說文義既協理致自明陳武顧以為講之不精何哉且心性天三者特所從言者異耳要之理則一而已矣故凡盡此心者必知此性者也苟不知之若之何其盡之既知之矣則所謂天者豈外此而他求哉世之學者每有心小性大之蔽意謂必先盡其心而後可馴致其極以知夫性殊不知性與心初無間而知與盡則有序性與心無間則謂知性故能盡心者於義無傷知與盡有序則謂盡之為先而知之為後者是失其先後之倫也集註於心性天三者之說可謂條理明白指趣分明讀者可以曉然無疑矣而陳武顧謂其外逆心性之說何哉洪範言思與此不類若大學之言知中庸之言明大抵皆以知為先集註所謂必能知而後能盡者正與之合陳武顧謂其不達於此何哉夫朱先生之學其所資也博其所自得也多其師承實自楊氏而其說經則與龜山異者甚衆蓋惟其當而已惟其合於聖賢之本意而已陳武



偶見此條意謂此乃孟子中大節目而為說之異如此  
自喜得聞而起攻之何其謬哉模倣按駁議衛道甚嚴於  
集註極有功但心小性大之辨特以性與心初  
無間言之則恐其猶未盡心統性情之說耳 ○孟子

曰莫非命也順受其正

人物之生吉凶禍福皆天所命然惟莫之致而至者乃為正命

故君子修身以俟之

是故知命者不立乎巖牆之下

謂

正命巖牆牆之將覆者知正命則不處危地以取覆壓之禍

盡其道而死者正命也

盡其道則所值之吉凶皆莫之致而至者矣

桎梏死者非正命也

桎梏所以拘罪人者

言犯罪而死與立巖牆之下者同皆人所取非天所為也○此章與上章蓋一時之言所以發其末句未盡之意○集疏曰問桎梏而死者非正命也然亦是命否程子曰聖人只教人順受其正不說命或曰桎梏而死者

非命乎曰孟子自說了莫非命也然聖人却不說是命張子曰今居巖牆之下壓而死者不可言正命盡其道而死者則始到其本分所受之命也范氏曰立巖牆之下則有覆壓之虞作不善之行則有及身之災此乃人自取之非正命也桎梏而死則刑戮也小人不能遠害是不知命故被戮而死非正命也君子不能遠害是不知命故立巖牆而死者非正命也問莫非命也順受其正朱子曰前面事都未見得吉凶禍福皆不可知但有正有不正自家既受他正底自家身分無過恁地死了便是正命若立巖牆之下與桎梏而死便不是正命問莫非命也此一句是總說氣稟之命與天命謂性之命同否曰孟子自來不甚說氣稟看來此句只是說人物之生吉凶禍福皆天所命人但當順受其正若桎梏而死與立巖牆之下而死便是自取又曰莫非命也是活路在這裏看他如何來問人或死於干戈死於患難如比干之類亦正命乎曰固是正命又問以理言之則謂

之正命以死生論之則非正命如何曰如何恁地說盡其道而死者正命也當死而不死却是失其正命此處須當活看如說桎梏而死非正命也須看孟子意如何如公冶長雖在縲紲之中非其罪也若死於縲紲不成說不是正命有罪無罪在我而已古人所以殺身成仁舍生取義志士不忘在溝壑勇士不忘喪其元學者須是於此處見得

○孟子曰求則得之舍則失之是求有益於得也求在我者也

舍上聲○在我者謂仁義禮智凡性之所有者

求之有道得之

有命是求無益於得也求在外者也

有道言不可妄求有命則不可必得

在外者謂富貴利達凡外物皆是○趙氏曰言為仁由已富貴在天如不可求從我所好○集疏曰程子曰君子有義有命求則得之舍則失之是求有益於得也求在我者也此言義也求之有道得之有命是求無益於

得也求在外者也此言命也至於聖人則惟有義而無命行一不義殺一不辜而得天下不為也此言義而不言命也張子曰求有益求無益道德勉之則無不至人皆可以為堯舜於富貴則有得有不得或問程子以求在我者為義求在外者為命以求在我者為求義乎則下言求在外者非求命也謂以義而求乎則求在外者不可言以命而求也又有聖人有義而無命則義命之云似專為求在外者設此析而言之何也朱子曰在我者如仁義禮智之屬皆此理所當為以其求之得之莫不有義故曰義在外者如富貴利達之類皆命有所制以其求之雖有道而得之則有命故曰命然聖人則力為我之所當為而不問彼之所制故曰有義而無命此以所求之內外而言也若專為在外者言則後段所謂求之有道者義也得之有命者命也是其言各有當意各有指然錯綜而言則理亦無不通矣曰張子後說如何曰其言義命似專為求在外者言之其曰有內有外

者是又以求在外者為自有內外錯綜而觀亦無不通  
矣又曰義理身心所自有失而不知所以復之富貴身  
外之物求之唯恐不得縱使得之於身心無分毫之益  
況不可必得乎若義理求則得之能不喪其所有可以  
為賢為聖利害甚明孟子  
說命至此章方說得盡

○孟子曰萬物皆備於我矣

此言理之本然也大則君臣父子小則事物  
細微其當然之理無一不具於性分之內也反身而誠

樂莫大焉

樂音洛○誠實也言反諸身而所備之理皆  
如惡惡臭好好色之實然則其行之不待勉

強而無不利矣其  
為樂孰大於是

強恕而行求仁莫近焉

強上聲○強  
勉強也恕推

己以及人也反身而誠則仁矣其有未誠則是猶有私  
意之隔而理未純也故當凡事勉強推己及人庶幾心  
公理得而仁不遠也○此章言萬物之理具於吾身體  
之而實則道在我而樂有餘行之以恕則私不容而仁

可得○集疏曰或問萬物皆備朱子曰萬物之生同乎一本其所以生此一物者即其所以生萬物之理也故一物之中莫不有萬物之理焉所謂萬物皆備云者亦曰有其理而已矣又曰如萬物莫不有君臣之義自家這裏也有萬物莫不有父子之親自家這裏也有萬物莫不有兄弟之愛自家這裏也有萬物莫不有夫婦之別自家這裏也有是這道理本備於吾身反之吾身於君臣必盡其義於父子必盡其親於兄弟必盡其愛於夫婦必盡其別莫不各盡其當然之實理而無一毫之不盡則仰不愧俯不作自然是快活若是反之於身有些子不實則中心愧作不能以自安如何得會樂張子曰萬物皆備於我矣言萬物皆素定於我也行有不慊於心則餒矣故反身而誠樂莫大焉若不是實做工夫到這裏如何見得恁地萬物皆備於我橫渠一段將來說得甚實所謂萬事皆備在我者便只是君臣本來有義父子本來有親夫婦本來有別之類皆是本來在我

者若事君有所不足於敬事親有所不足於孝以至夫婦無別兄弟不友朋友不信便是我不能盡之反身則是不誠真若有不可言者安得所謂樂若如禪家之語只空虛中打箇筋斗者無著力處又曰反身而誠蓋知之已至而自然循理所以樂強恕而行是知之未至且恁把捉勉強做去少間到純熟處便是仁又曰反身而誠乃是反求諸身而實有是理非出於勉強偽為此此是見得透信得及處到此地位則推以及物不待勉強而仁在我矣下言強恕而行者蓋言未及於此則當強恕以去己私之蔽而求得夫天理之公也又曰強恕者亦是見得萬物皆備於我了只爭一箇反身而誠便須要強恕上做工夫他心裏不能推己及人便須勉強行恕拗轉這道理然亦只是要去箇私意而已私意既去則萬物自然無欠闕處或問強恕初不言忠無忠何以為恕邪曰有心為恕則忠固在其中矣所謂無忠做恕不出兩字不容去一者正謂此也

○孟子

曰行之而不著焉習矣而不察焉終身由之而不知其

道者衆也

著者知之明察者識之精言方行之而不能明其所當然既習矣而猶不識其所以然所

以終身由之而不知其道者多也○集疏曰朱子曰方行之際則明其當然之理是行之而著既行之後則識其所以然是習矣而察初間是照管向前○孟子曰人去後來是回顧後面看所行之道理如何○孟子曰人

不可以無恥無恥之恥無恥矣

趙氏曰人能恥己之無所恥是能改行從善之

人終身無復有恥辱之累矣

○孟子曰恥之於人大矣

恥者吾所固有羞惡之心

也存之則進於聖賢失之則入於禽獸故所繫為甚大

為機變之巧者無所用恥

焉

為機械變詐之巧者所為之事皆人所深恥而不恥彼方且自以為為得計故無所用其愧恥之心也



不若人何若人有

但無恥一事不如人則事事不如人矣或曰不恥其不如人則何能有如

人之事其義亦通○或問人有恥不能之心如何程子曰恥其不能而為之可也恥其不能而掩藏之不可也○集疏曰或問六章七章之說朱子曰六章李氏以為人而無恥則其為恥也無復可恥矣七章亦有謂人若不恥其不及人則終不能及人者於義亦通

○孟子曰古之賢王好善而忘

勢古之賢士何獨不然樂其道而忘人之勢故王公不

致敬盡禮則不得亟見之見且猶不得亟而況得而臣

之乎

好去聲樂音洛亟去吏反○言君當屈已以下賢士不枉道而求利二者勢若相反而實則相成蓋

亦各盡其道而已

○孟子謂宋句踐曰子好遊乎吾語子遊

音句

鉤好語皆去聲○宋人知之亦囂囂人不知亦囂囂

趙氏

曰囂囂自得無欲之貌

曰何如斯可以囂囂矣曰尊德樂義則可

以囂囂矣

樂音洛○德謂所得之善尊之則有以自重而不慕乎人爵之榮義謂所守之正樂之則

有以自安而不徇乎外物之誘也

故士窮不失義達不離道

離力智反○言不以

貧賤而移不以富貴而淫此尊德樂義見於行事之實也

窮不失義故士得已焉達

不離道故民不失望焉

得已言不失已也民不失望言人素望其興道致治而今果如

所望也

古之人得志澤加於民不得志修身見於世窮則

獨善其身達則兼善天下

見音峴○見謂名實之顯著也此又言士得已民不失望

之實○此章言內重而外輕則無往而不善○集疏曰  
范氏曰孟子每言道德以義配之窮不失義達不離道  
此以義配道也尊德樂義此以義配德也道無義不足  
以為道德無義不足以為德率性之謂道得於己之謂  
德行而宜之之謂義士不知義則無以為道德故○孟  
子每言道德必以義配之謂其行而得宜也

子曰待文王而後興者凡民也若夫豪傑之士雖無文

王猶興

夫音扶○興者感動奮發之意凡民庸常之人  
也豪傑有過人之才智者也蓋降衷秉彝人所

同得唯上智之才無物欲之蔽為能無待於教而自能  
感發以有為也○集疏曰范氏曰凡民待文王而後興  
若夫豪傑之士雖無文王猶興聖人則不然前聖後聖  
其揆一也舜文相去千有餘歲若合符節由堯舜至湯  
五百有餘歲湯聞堯舜之道而知之由湯至於文王五  
百有餘歲文王聞湯之道而知之由文王至於孔子五

百有餘歲孔子聞文王之道而知之聞而知之者聖同也孔子曰文王既沒文不在茲乎後世去文王既遠讀其書行其道是亦文王矣凡民興起必待文王豪傑之士不待文王聖人則與文王同道孟子但言豪傑之士者為賢人法也朱子曰范氏推言聖人一節甚得言外之意

○孟子曰附之以韓魏

之家如其自視欲然則過人遠矣

欲音坎○附蓋也韓魏晉卿富家也欲然

不自滿之意尹氏曰言有過人之識則不以富貴為事

○孟子曰以佚道使民雖

勞不怨以生道殺民雖死不怨殺者

程子曰以佚道使民謂本欲佚之也

播穀乘屋之類是也以生道殺民謂本欲生之也除害去惡之類是也蓋不得已而為其所當為則雖拂民之欲而民不怨其不然者反是○集疏曰或問此章之說曰去惡除害固尹氏所引程子之說也而程子又自有

救焚拯溺之說去此取彼何也朱子曰救焚拯溺非常  
有之事所指者狹若曰去惡除害則正所謂辟以止辟  
者彼為惡以害人其罪當死吾求所以生之者不得而  
後殺之以安衆而厲其餘凡此皆以生道殺之也彼亦  
何怨之有且或去惡如伐叛除害如救水火往者不幸  
而死亦無所怨此又足以兼彼之說而彼不足以兼此  
也

○孟子曰霸者之民驩虞如也王者之民皞皞如也

皞胡老反○驩虞與歡娛同皞皞廣大自得之貌程子  
曰驩虞有所造為而然豈能久也耕田鑿井帝力何有  
於我如天之自然乃王者之政楊氏曰所以致人驩虞  
必有違道干譽之事若王者則如天亦不令人喜亦不  
令人怒  
殺之而不怨利之而不庸民日遷善而不知為之  
者

此所謂皞皞如也庸功也豐氏曰因民之所惡而去  
之非有心於殺之也何怨之有因民之所利而利之

非有心於利之也何庸之有輔其性之自然使自得之故民日遷善而不知誰之所為也○豐氏名稷字相之

夫君子所過者化所存者神上下與天地同流豈曰小

補之哉

夫音扶○君子聖人之通稱也所過者化身所經歷之處即人無不化如舜之耕歷山而田者

讓畔陶河濱而器不苦窳也所存者神心所存主處便神妙不測如孔子之立斯立道斯行綏斯來動斯和莫知所以然而然也是其德業之盛乃與天地之化同運並行舉一世而甄陶之非如霸者但小小補塞其罅漏而已此則王道之所以為大而學者所當盡心也○集疏曰程子曰所存者神在已也所過者化及物也或問過化存神之說朱子曰張謝皆疑於老佛之意以此章上文考之恐其指不為是也故程子直以所過者化為及物而於易傳又有所過變化如虎豹炳蔚之言其旨明矣蓋言所過者化則凡所經歷物無不化不必久於

此而深治之然後物從其化也其曰在己者蓋以化者無意而及物此則誠於此而動於彼如所謂從欲以治也但其感應之速如影響形聲之召有不知其所以然者是則所謂神耳又曰過化只是過處人便化更不待久存神此纔有所存彼便應言感應之速問所經歷皆化即是民化之非大而化之之化曰作大化之化有病過了者化則是未過時却凝滯於此答張敬夫曰程子謂所過者化是身所經歷處便化所存者神是心所存主處便神蓋言其不待居之久而後見其效也經歷及便字尤見其意其曰經歷亦不必為經行之地凡其身之所臨政之所及風聲德澤之所被皆謂經歷也所經歷處纔需著些便化雷一震而萬物俱生動霜一降而萬物皆成實又曰荀子亦有過化存神之語此必古語問同流與天地同其神化否曰此難言各有一分在裏曰是箇參贊意否曰亦不是參贊問上下與天地同流豈曰小補之哉曰小補只是逐片逐些補綴上下與天

地同流重鑄一番過相似○孟子曰仁言不如仁聲之入人深也程子

曰仁言謂以仁厚之言加於民仁聲謂仁聞謂有仁之實而為衆所稱道者也此尤見仁德之昭著故其感人尤深善政不如善教之得民也政謂法度禁令所以制其外也教謂道德齊禮

所以格善政民畏之善教民愛之善政得民財善教得

民心得民財者百姓足而君無不足也○孟子曰人之

所不學而能者其良能也所不慮而知者其良知也良者

本然之善也程子曰良知良能皆無所由乃出於天不係於人孩提之童無不知愛其

親者及其長也無不知敬其兄也長上聲下同○孩提二三歲之間知孩笑



可提抱者也愛親敬長  
所謂良知良能者也

親親仁也敬長義也無他達之

天下也

言親親敬長雖一人之私然達之天下無不同者所以為仁義也○集疏曰朱子曰無他達之

天下只說達之天下無別道理

○孟子曰舜之居深山之中與木石居

與鹿豕遊其所以異於深山之野人者幾希及其聞一

善言見一善行若決江河沛然莫之能禦也

行去聲○居深山謂

耕歷山時也蓋聖人之心至虛至明渾然之中萬理畢具一有感動則其應甚速而無所不通非孟子造道之深不能形容至此也○集疏曰問舜聞善言見善行若決江河沛然莫能禦不知未有所聞見時氣象如何朱子曰湛然而已其理充塞具○孟子曰無為其所不為備一有所觸便沛然不可禦

無欲其所不欲如此而已矣

李氏曰有所不為不欲人皆有是心也至於私意一

萌而不能以禮義制之則為所不欲所不欲者多矣能反是心則所謂擴充其羞惡之心者而義不可勝用矣故曰如此而已矣○集疏曰范氏曰君子所當為者義也所不可為者不義也所欲者善也所不欲者不善也所不為者不義則所為皆義不欲者不善則所欲皆善朱子曰人心至靈其所不當為不當欲之事初間何嘗不知既而計較利害却自以為不妨便自冒昧為之欲之耳今既知所不當為不當欲者便當就這裏截斷然不為不欲故曰如此而已矣○孟子曰人之有德慧術知者恒存乎

疾疾

知去聲疾丑刀反○德慧者德之慧術知者術之知疾疾猶災害也言人必有疾疾則能動心忍性

增益其所不能也

獨孤臣孽子其操心也危其慮患也深故達

孤臣遠臣孽子庶子皆不得於君親而常有疾○孟子

曰有事君人者事是君則為容悅者也○孟子

夫之事妾婦之道也○有安社稷臣者以安社稷為悅者也○孟子

社稷如小人之務悅其君眷眷於此而不忘也○有天民者達可行於天下而後

行之者也○孟子

然則寧沒世不見知而不悔不肯小用其道以徇於人也○孟子

人者正己而物正者也○孟子

人品不同畧有四等容悅佞臣不足言安社稷則忠矣然猶一國之士也○孟子

無意無必唯其所在而物無不化唯聖者能之○集疏  
曰問天民大人如何朱子曰大幾聖矣以言詭氣象揣  
度則達可行於天下而後行之與正已而物正者亦不  
得不異且如伊尹曰吾豈若使是君為堯舜之君哉吾  
豈若使是民為堯舜之民哉豈若於吾身親見之哉又  
曰子將以斯道覺斯民也非子覺之而誰也此可謂達  
可行於天下而後行之矣其於舜之恭已正南面而已  
矣如何哉又曰天民專指潛隱未得位者大人則其德  
已著如乾之二五通上下而言之也此不言聖○孟子  
人者如乾之大人豈必以為光輝而未化者邪

曰君子有三樂而王天下不與存焉

樂音洛王與皆去聲下並同

父

母俱存兄弟無故一樂也

此人所深願而不可必得者今既得之其樂可知

仰

不愧於天俯不忤於人二樂也

程子曰人能克已則仰不愧俯不忤心廣體胖

其樂可知有息則餒矣

得天下英才而教育之三樂也

盡得一世明睿之才

而以下所樂乎已者教而養之則斯道之傳得之者衆而天下後世將無不被其澤矣聖人之心所願欲者莫大於此今既得之君子有三樂而王天下不與存焉

林氏曰此

三樂者一係於天一係於人其可以自致者惟不愧不忤而已學者可不勉哉

○孟子曰廣土

衆民君子欲之所樂不存焉

樂音洛下同○地闢民聚澤可遠施故君子欲之然

未足以為樂也

中天下而立定四海之民君子樂之所性不存

焉

其道大行無一夫不被其澤故君子樂之然其所得於天者則不在是也

君子所性雖大

行不加焉雖窮居不損焉分定故也

分去聲○分者所得於天之全體故

不以窮達而有異○集疏曰朱子曰中天下而立定四海之民固是人所欲與其處畎畝之中孰若進而得行其道使天下皆被其澤要得出行其道者是亦人之所欲但其用其舍於我性分之內本不相關進而大行退而窮居於我性分之內無所加損又曰此君子是通聖人而言所性是說生來承受之性君子所性只是這一箇道理雖達而為堯舜在上亦不是加添些子若窮而為孔孟在下亦不是減少些子蓋這一箇道理合下都定了更添君子所性仁義禮智根於心其生色也晬然減不得

見於面盎於背施於四體四體不言而喻

晬音粹見音現盎烏浪反

○上言所性之分與所欲所樂不同此乃言其蘊也仁義禮智性之四德也根本也生發見也晬然清和潤澤之貌盎豐厚盈溢之意施於四體謂見於動作威儀之間也喻曉也四體不言而喻言四體不待吾言而自能

曉吾意也蓋氣稟清明無物欲之累則性之四德根本  
於心其積之盛則發而著見於外者不待言而無不順  
也程子曰睟面盎背皆積盛致然四體不言而喻惟有  
德者能之○此章言君子固欲其道之大行然其所得  
於天者則不以是而有所加損也○集疏曰或問此章  
之說朱子曰程子至矣楊氏以仁義禮智根於心為本  
來如此者亦曰其所稟者然爾君子所性猶堯舜性之  
之云也又曰仁義禮智根於心便見得四端著在心上  
相離不得纔有私意便剗斷了那根更無生意譬如本  
根著在土上方會生其色也睟然都從那根上發出來  
且性字從心便見得先有這心便有許多物在其中養  
得到便自然生根是下工夫做來問四體不言而喻曰  
是四體不待命令而自然如此謂手容不待教他恭而自  
然恭足容不待教他重而自然重模聞師云看文字當  
看大意又看句語中何字最切要孟子謂仁義禮智根  
於心只根字甚有意蓋根於心者培壅得厚盛則發見

於外者自然辟面盎背到得手足便順不覺其所以然此是甚次第廣土衆民其道大行自有不容遏窮達不足道也

○孟子曰伯夷辟紂居北海之濱聞文王作興曰盍歸乎來吾聞西伯善養老者大公辟紂居東海之濱

聞文王作興曰盍歸乎來吾聞西伯善養老者天下有

善養老者則仁人以為已歸矣

辟去聲下同大他蓋反○已歸謂已之所歸餘見前

篇五畝之宅樹牆下以桑匹婦蠶之則老者足以衣帛

矣五母雞二母彘無失其時老者足以無失肉矣百畝

之田匹夫耕之八口之家可以無飢矣

衣去聲○此文王之政也一家



養母雞五母彘  
二也餘見前篇  
所謂西伯善養老者制其田里教之樹

畜導其妻子使養其老五十非帛不煖七十非肉不飽

不煖不飽謂之凍餒文王之民無凍餒之老者此之謂

也  
田謂百畝之田里謂五畝之宅樹謂耕桑畜謂雞彘也趙氏曰善養老者教導之使可以養其老耳非家

賜而人益之也  
○孟子曰易其田疇薄其稅斂民可使富也  
易斂

皆去聲○易治也  
食之以時用之以禮財不可勝用也

勝音升○教民節儉則財用足也  
民非水火不生活昏暮叩人之門戶

求水火無弗與者至足矣聖人治天下使有菽粟如水

火菽粟如水火而民焉有不仁者乎

馬於康反○水火民之所急宜其愛

之而反不愛者多故也尹氏曰言禮義生於富足民無常產則無常心矣○集疏曰范氏曰聖人治天下當使家給人足財用有餘五穀易得有如水火若使菽粟如水火則人知廉恥興於禮義豈有不仁者乎聖人之治天下既庶而後富之既富而後教之倉廩實而知禮節衣食足而知榮辱所謂菽粟如水火則民焉有不仁堯舜三王之盛皆由此道也又曰先王養天下之民非人衣食之也唯不奪農時則皆得治其田疇恭儉節用則可以薄其稅斂此二者使富足之道也天生時而地生財所以養人食之不以時用之不以禮則天地之力亦不能給是以古之明主欲治天下先治其心人君之心清靜而省事淡泊而寡欲則萬民得其所萬物得其性

○孟子曰孔子登東山而小魯登太山而小天下故

觀於海者難為水遊於聖人之門者難為言

此言聖人之道大也

東山蓋魯城東之高山而太山則又高矣此言所處益高則其視下益小所見既大則其小者不足觀也難為水難為言猶仁不可為衆之意也

觀水有術必觀其瀾日月有明容光

必照焉

此言道之有本也瀾水之湍急處也明者光之體光者明之用也觀水之瀾則知其源之有本

矣觀日月於容光之隙無不照則知其明之有本矣○集疏曰程子曰觀瀾必照言其道之無窮瀾水之動處苟非源之無窮則無以為瀾非日月之明無窮則無以容光必照成章者篤實而有光輝也又曰日月之明有本故凡容光必照君子之道有本故無不及也成章易曰美在其中暢於四支之謂也或問此章之說朱子曰程子至矣其曰無窮又曰有本當合之曰言道之有本而無窮則善此章雜取衆理錯比成文以明難明之理

問觀其濶處便見其本邪抑觀其濶知其有本了又須窮其本所自來曰觀其濶是就濶處便見其本更去那裏別討

流水之為物也不盈科不行君子之志於道也

不成章不達

言學當以漸乃能至也成章所積者厚而文章外見也達者足於此而通於彼也○

此章言聖人之道大而有本學之者必以其漸乃能至也○集疏曰問成章朱子曰成章是做得成片段有文理可觀如子貢之辯子路之勇都是真箇做得成了不是半上落下今日做得明日又休也此一章如詩之有比興比者但比之以他物而不說其事如何興則引物以發其意而終翫破其事也如孔子登東山而小魯至難為言此興也觀水有術至容光必照焉此比也流水之為物也至不成章不達此又是興也流水之為物也不盈科不行君子之志於道也不成章不達蓋人之為學須是務實乃能有進若這裏工夫欠了分毫定是要

透過那裏不得○孟子曰雞鳴而起孳孳為善者舜之徒也

孳孳

勤勉之意言雖未至於雞鳴而起孳孳為利者蹠之徒

也蹠盜也欲知舜與蹠之分無他利與善之間也

程子曰言間者

謂相去不遠所爭毫末耳善與利公私而已矣才出於

善便以利言也○楊氏曰舜蹠之相去遠矣而其分乃

在利害之間而已是豈可以不謹然講之不熟見之不

明未有不以利為義者又學者所當深察也或問雞鳴

而起若未接物如何為善程子曰只主於敬便是為善

○集疏曰或問此章之說朱子曰程子未接物時之論

尤能發明言外之意又嘗言不獨財利之利凡有利心

便不可如作一事須尋自家穩便處皆利心也如此則

善利之間相去毫髮苟辨之不明其不反以利為善者

鮮矣此大學之道所以雖以誠意正心為重而必以格

物致知為先也問孳孳為善曰如今且須常存箇誠敬做主學問方有歸著如有屋舍了零零碎碎方有安頓處不然却似無家舍人雖有千金之寶亦無安頓處問利與善之間曰不是冷水便是熱湯無奈中間溫吞難入暖處利與善之間若纔有一念要人知要人道好要以此求利祿皆為利也此樣極多雖所為皆善但有一點黑欣慕外物之心便是利了如一塊潔白物只著一點黑便不得為白矣黃氏云事所當為之謂善有為而為之謂利為君而仁為臣而敬為子而孝為父而慈事之所當為者也為內交為要譽為宮室之美為妻妾之奉有為而為之者也善者天理之公利者人慾之私善利之間相去甚近而一則為舜一則為跖乃由是而分焉蓋人心之靈與天地同體純粹至善萬理具焉雞鳴而起孳孳在是則舜之兢兢業業由仁義行者亦是心也見便則趨見利則奪枉尺直尋則為之損人益己則為之雞鳴而起孳孳在是則盜跖之暴戾恣睢日殺不辜亦

是心也一善利之間而上智下愚之分乃如此差之毫釐繆以千里可不謹哉孟子發明善利之論而尤謹其所謂間者蓋欲學者精別於毫釐之際而審其所趨向也至其答梁王之問告宋牼之詞皆奉奉於義利之別其示人之意切矣學者誠能澄心靜慮反觀內省於其所謂間者而致察焉凡吾一念之發果善乎果利乎善則行之利則避之朝於斯夕於斯就其如舜者去其不如舜者是亦舜而已矣苟為不然則計較於毫髮之微而甚至於父子兄弟不相保其不同禽獸者無幾爾一念之差固若此哉學者不可以不察

○孟子

曰楊子取為我拔一毛而利天下不為也

為我之為去聲○楊子名

朱取者僅足之意取為我者僅足於為我而已不及為人

也列子稱其言曰伯成子高不以一毫利物是也

墨子兼愛摩頂放踵利天下為之

放上聲○墨子名翟兼愛無所不愛也摩

頂摩突其頂也放至也

子莫執中執中為近之執中無權猶執一

也

子莫魯之賢人也知楊墨之失中也故度於二者之間而執其中近近道也權稱錘也所以稱物之輕重

而取中也執中而無權則膠於一定之中而不知變是亦執一而已矣程子曰中字最難識須是默識心通且試言一廳則中央為中一家則廳非中而堂為中一國則堂非中而國之中為中推此類可見矣又曰中不可執也識得則事事物物皆有自然之中不待安排安排著則不中矣

所惡執一者為其賊

道也舉一而廢百也

惡為皆去聲○賊害也為我害仁兼愛害義執中者害於時中皆舉

一而廢百者也○此章言道之所貴者中中之所貴者權楊氏曰禹稷三過其門而不入苟不當其中則與墨子無異顏子在陋巷不改其樂苟不當其可則與楊氏無異子莫執中為我兼愛之中而無權鄉鄰有鬪而不知



閉戶同室有鬪而不知救之是亦猶執一耳故孟子以  
為賊道禹稷顏子易地則皆然以其有權也不然則是  
亦楊墨而已矣○集疏曰朱子曰莊子數稱楊子恐如  
今道流修煉保齋神氣一句話也不妄與人說又曰楊  
朱看來不似義只是箇道遙物外僅足其身微似義耳  
然不似也問楊墨固是皆不得中至子莫又要安排尋  
討箇中執之曰子莫見楊墨皆偏在一處要就二者之  
中執之政是安排尋討也原其意思固好只是見不分  
明依舊不是且如三過其門而不入在禹稷之時則可  
在顏子之時則不可居陋巷在顏子之時則是中在禹  
稷之時則非中矣居陋巷則似楊氏三過其門而不入  
則似墨氏要之禹稷似兼愛而非兼愛顏子似為我而  
非為我又曰三聖相授允執厥中與孟子所論子莫執  
中者文同而意異蓋精一於道心之微則無適而非中  
者其曰允執則非徒然而執之矣子莫之為執中則其  
為我不敢為楊朱之深兼愛不敢為墨翟之過而於二

者之中執其一節以為中耳故由三聖以為中則其中  
活由子莫以為中則其中死中之活者不待權而無不  
中中之死者則非學乎聖人之學不能有以權之而常  
適於中也權者權衡之權言其可以稱物輕重以適於  
平蓋所以節量仁義之輕重而時措之非如近世所謂  
將以濟乎仁義之窮者也黃氏云道者何中而已無過  
不及之謂中時措之宜謂之時中是皆人心之本然而  
不容已天理之至正而不可易者也天地之化亦大矣  
小有偏焉則雨暘寒暑各失其節人受天地之中以生  
喜怒哀樂念慮云為其可以有所偏邪楊氏之為我墨  
氏之兼愛皆不得其中子莫之執中又非所以為時中  
也孟子從而闢之所以正人心明天理為天下後世慮  
至切也夫墨之兼愛似仁楊之為我似義孟子極言其  
禍至於無父無君以禽獸目之志於道而不得其中豈  
不甚可  
○孟子曰飢者甘食渴者甘飲是未得飲食之  
畏哉

正也飢渴害之也豈惟口腹有飢渴之害人心亦皆有

害

口腹為飢渴所害故於飲食不暇擇而失其正味人心為貧賤所害故於富貴不暇擇而失其正理人

能無以飢渴之害為心害則不及人不為憂矣

人能不以貧賤

之故而動其心則過人遠矣

○孟子曰柳下惠不以三公易其介

有介

分辨之意柳下惠進不隱賢必以其道遺佚不怨阨窮不憫直道事人至於三黜是其介也○此章言柳下惠和而不流與孔子論夷齊不念舊惡意正相類皆聖賢微顯闡幽之意也○集疏曰或問柳下惠不辭小官楊氏既以為和又以為介何也朱子曰不辭小官和而介也人知其為和而不知其為介焉○孟子曰

有為者辟若掘井掘井九韞而不及泉猶為棄井也

辟讀

作譬勅音刃與仞同○八尺為仞言鑿井雖深然未及泉而止猶為自棄其井也○呂侍講曰仁不如堯孝不如舜學不如孔子終未入於聖人之域終未至於天道未免為半途而廢自棄前功也○孟子曰

堯舜性之也湯武身之也五霸假之也

堯舜天性渾全不假修習湯武

修身體道以復其性五霸則假借仁義之名以求濟其貪欲之私耳

久假而不歸惡知其

非有也

惡平聲○歸還也有實有也言竊其名以終身而不自知其非真有或曰蓋歎世人莫覺其偽

者亦通舊說久假不歸即為真有則誤矣○尹氏曰性之者與道一也身之者履之也及其成功則一也五霸則假之而已是以功烈如彼其卑也○集疏曰問性之身之朱子曰性之是合下如此身之是做到那田地久假不歸舊看此句甚費思量有數樣說今所留三說亦自倒斷不下又曰諸家說使其能久假而不歸烏知終

非其有遂引惹得司馬溫公蘇氏來闢孟子

○公孫丑曰伊尹曰予不狎于

不順放太甲于桐民大悅太甲賢又反之民大悅

予不狎于

不順太甲篇文狎習見也不順言太甲所為不順義理也餘見前篇

賢者之為人臣也其

君不賢則固可放與

與平聲

孟子曰有伊尹之志則可無

伊尹之志則篡也

伊尹之志公天下以為心而無一毫之私者也○集疏曰或問此章之說

朱子曰孟子但論在我者有是心則伊尹之事可為一有毫髮之偽雜乎其間則不免為篡賊耳模謂孟子此兩語不惟見伊尹之心如青天白日而百世之下姦臣亂賊亦無所逃其罪矣而則可之辭亦見處變僅可之意而非正法也○公孫丑曰詩曰不素餐兮君子之不耕而食

何也孟子曰君子居是國也其君用之則安富尊榮其

子弟從之則孝弟忠信不素餐兮孰大於是

○餐七丹反  
○詩魏國

風伐檀之篇素空也無功而食祿謂之素餐此與告陳相彭更之意同

○王子墊問曰士

何事

墊丁念反○墊齊王之子也上則公卿大夫下則農工商賈皆有所事而士居其間獨無所事故王

子問之也

孟子曰尚志

尚高尚也志者心之所之也士既未得行公卿大夫之道又不當為農工

商賈之業則高尚其志而已

曰何謂尚志曰仁義而已矣殺一無罪

非仁也非其有而取之非義也居惡在仁是也路惡在

義是也居仁由義大人之事備矣

惡平聲○非仁非義之事雖小不為而所

居所由無不在於仁義此士所以尚其志也大人謂公卿大夫言士雖未得大人之位而其志如此則大人之事體用已全若小人之事則固非所當為也○集疏曰朱子曰志字與父在觀其志之志同蓋未見於所行方見於所存也黃氏云人物並生於天地之間負陰而抱陽均氣而同體未始不相似也靈於物而謂之人賢於人而謂之士則其等級亦相遠絕矣渴飲而飢食趨利而避害人物之所同也士居其中獨超然有以異於人與物者何哉以其能立吾志而惟仁義之是趨也苟為不然則章甫其冠逢掖其衣懜然而無識類然而無志其所尚者不過飲食利害之間謂之人已有愧矣亦何以當為士之名哉故為士者要當以立志為先而立志者要當以仁義為主仁義者天理之自然人心之固有也為宅也而安為路也而正居而由之庶無愧於士之名不然則沒於飲食利害之間識陋而志卑醉生而夢死孟子所謂哀哉豈不甚可哀也哉

○孟子

曰仲子不義與之齊國而弗受人皆信之是舍簞食豆羹之義也人莫大焉亡親戚君臣上下以其小者信其

大者奚可哉

舍音捨食音嗣設若非義而與之齊國必不肯受齊人皆

○仲子陳仲子也言仲子

信其賢然此但小廉耳其辟兄離母不食君祿無人道之大倫罪莫大焉豈可以小廉信其大節而遂以為賢哉

○桃應問曰舜為天子臯陶為士瞽瞍殺人則如之

何

桃應孟子弟子也其意以為舜雖愛父而不可以私害公臯陶雖執法而不可以刑天子之父故設此問

以觀聖賢用心之所極非以為真有此事也

孟子曰執之而已矣

言臯陶之心知有法

而已不知有

然則舜不禁與

與平聲○桃應問也

曰夫舜惡得而



禁之夫有所受之也

夫音扶惡平聲○言臯陶之法有所傳受非所敢私雖天子之命亦

不得而廢之也

然則舜如之何

桃應問也

曰舜視棄天下猶棄敝跣

也竊負而逃遵海濱而處終身訢然樂而忘天下

跣音徒訢

與欣同樂音洛○跣草履也遵循也言舜之心知有父而已不知有天下也孟子嘗言舜視天下猶草芥而惟順於父母可以解憂與此章互相發○此章言為士者但知有法而不知天子父之為尊為子者但知有父而不知天下之為大蓋其所以為心者莫非天理之極人倫之至學者察此而有得焉則不待較計論量而天下無難處之事矣○集疏曰或問此章之說朱子曰桃應之問孟子之答皆非以為真有是事也蓋特極論聖賢之心以為臯陶知有法而不知有天子之父舜知有父而不知有天下各盡其道而不相悖焉爾又曰此章設

辭論辨皆以發明聖賢愛親守法之誠無非天理之極人倫之至脫然無一毫計較利害之私而權制之宜議請之法所未暇論也學者深玩乎此○孟子自范之齊而有得焉則天下無難處之事矣

望見齊王之子喟然嘆曰居移氣養移體大哉居乎夫

非盡人之子與

夫音扶與平聲○范齊邑居謂所處之位養奉養也言人之居處所繫甚大

子亦人子耳特以所居不同故所養不同而其氣體有異也

孟子曰

張鄒皆云義文也

王子

宮室車馬衣服多與人同而王子若彼者其居使之然

也況居天下之廣居者乎

廣居見前篇尹氏曰晬然見於面盎於背居天下之廣居

也

者然魯君之宋呼於垤澤之門守者曰此非吾君也何

其聲之似我君也此無他居相似也

呼去聲○垣澤宋城門名也孟子又

引此事為證

○孟子曰食而弗愛豕交之也愛而不敬獸畜

之也

食音嗣畜許六反○交接也畜養也獸謂犬馬之屬

恭敬者幣之未將者也

將猶奉也詩曰承筐是將程子曰恭敬雖因威儀幣帛而後發見然幣之未將時已有此恭敬之心非因幣帛而有也恭敬而無實君子不可虛拘

此言當時諸侯之待賢者特以幣帛為恭

敬而無其實也拘留也

○孟子曰形色天性也惟聖人然後可以

踐形

人之有形有色無不各有自然之理所謂天性也踐如踐言之踐蓋衆人有是形而不能盡其理故

無以踐其形惟聖人有是形而又能盡其理然後可以踐其形而無歉也○程子曰此言聖人盡得人道而能

充其形也蓋人得天地之正氣而生與萬物不同既為人須盡得人理然後稱其名衆人有之而不知賢人踐之而未盡能充其形惟聖人也楊氏曰天生蒸民有物有則物者形色也則者性也各盡其則則可以踐形矣○集疏曰或問踐形之說朱子曰人之生於天地之間也莫不有是形其有是形也莫不有是色而本其所得於天者則是形是色莫不有所以然之故焉莫不有所當然之則焉是則所謂天性者也然衆人梏於氣稟之偏徂於習俗之蔽而不能無人欲之私是以視則不明聽則不聰貌則不恭言則不從蓋不能盡其形色本然之理則雖有是形而無以踐其形也惟聖人能盡其性而無一毫人欲之私雜於其間是以視則極明聽則極聰貌則極恭言則極從蓋凡形色本然之理無一不盡既有是形而又可以踐其形焉云者本有是物而又能修其實以副之如踐言之踐也又曰聖人所為便踏著箇形色之性又曰伊川說充其形色自是說得好了形

只是這形體色如臨喪則有哀色介冑則有不可犯之色之類天之生人人之得於天其具耳目口鼻者莫不能盡別天下之味鼻便必能盡別天下之臭聖人與常情都一般惟衆人有氣稟之雜物欲之累雖同是耳也而不足以聰雖同是目也而不足以明雖同是口也而不足以別味雖同是鼻也而不足以別臭是雖有是形惟其不足故不能充踐此形惟聖人耳則十分聰而無一毫之不能聰目則十分明而無一毫之不明口鼻莫不皆然惟聖人如此方可以踐此形蔡氏云形色出於天性謂之非天性則不可然以耳目口鼻四肢而言則天下之人莫不踐焉苟惟形是踐則從欲必至於滅性故惟聖人盡性然後可以踐之惟字與然後可以字更當熟玩

○齊宣王欲短喪公孫

丑曰為菽之喪猶愈於已乎

已猶止也

孟子曰是猶或終其

兄之臂子謂之姑徐徐云爾亦教之孝弟而已矣

忍終反

○終戾也教之以孝弟之道則彼當自知兄之不可戾而喪之不可短矣孔子曰子生三年然後免於父母之懷予也有三年之愛於其父母乎所謂教之以孝弟者如此蓋示之以至情之不能已者非強之也

王子

有其母死者其傳為之請數月之喪公孫丑曰若此者

何如也

為去聲○陳氏曰王子所生之母死厭於嫡母而不敢終喪其傳為請於王欲使得行數月之

喪也時又適有此事丑問如此者是非何如按儀禮公

子為其母練冠麻衣緇緣既葬除之疑當時此禮已廢

或既葬而未忍即除故請之也

曰是欲終之而不可得也雖加一日愈

於已謂夫莫之禁而弗為者也

夫音扶○言王子欲終喪而不可得其傳為請

雖止得加一日猶勝不加我前所譏乃謂夫莫之禁而自不為者耳○此章言三年通喪天經地義不容私意有所短長示之至情則不肖者有以企而及之矣○孟子曰君子之所以教者

五

下文五者蓋因人品高下或相去遠近先後之不同

有如時雨化之者

時雨及時之雨

也草木之生播種封殖人力已至而未能力自化所少者雨露之滋耳及此時而雨之則其化速矣教人之妙亦猶是也若孔子有成德者有達財者財與材同此各因之所長而教之者

也成德如孔子之於冉閔達財如孔子之於由賜

有答問者

就所問而答之若孔子之於樊遲萬

章有私淑艾者

艾音义○私竊也淑善也艾治也人或不能及門受業但聞君子之道於人而

竊以善治其身是亦君子教誨之所及若孔孟之於陳亢夷之是也孟子亦曰予未得為孔子徒也予私淑諸

人此五者君子之所以教也

聖賢施教各因其材小以成大無棄人也

○集疏曰朱子曰有如時雨化之者他地位已到因而發之孔子於顏曾是也其次成德達財又隨人資材成就有答問者未及師承只是相答問而已私淑艾者未嘗親見面授只是或聞其風而師慕之或私竊傳其善言善行學之以善其身是亦君子之教誨也舊解有私淑艾者謂自善其身而示教於人然考孟子所謂予未得為孔子徒也予私淑諸人也此人者是孟子指其師友子思之徒以謂予不得親見孔子而師之只是我私竊傳其善於人者如有私淑艾者却是君子之所以教者五孔子告顏子以博文約禮告曾子以一貫此所謂時雨化之者也時雨云者不先不後適當其時而已也又云此五者一節輕似一節

○公孫丑曰

道則高矣美矣宜若登天然似不可及也何不使彼為



可幾及而日孳孳也

幾音機

孟子曰大匠不為拙工改廢

繩墨羿不為拙射變其彀率

為去聲彀古侯反率音律  
○彀率彎弓之限也言教

人者皆有不可易之法不容  
自貶以徇學者之不能也

君子引而不發躍如也中

道而立能者從之

引引弓也發發矢也躍如如踴躍而  
出也因上文彀率而言君子教人但

授以學之法而不告以得之之妙如射者之引弓而  
不發矢然其所不告者已如踴躍而見於前矣中者無  
過不及之謂中道而立言其非難非易能者從之言學  
者當自勉也○此章言道有定體教有成法卑不可抗  
高不可貶語不能顯默不能藏○集疏曰問引而不發  
朱子曰謂漸開其端而不竟其說躍如謂義理昭著如  
有物躍然於心目之間躍如是道理活潑潑地發出在  
面前如由中躍出須知得是引箇甚麼是如何地不發

又是甚麼物事躍在面前須是聳起心目與他看令此  
心精一無少夾雜方始見得精妙處又曰道理散在天  
下事物之間聖賢不是不說自是微妙處不容說然雖  
不說只纔撥動此箇道理又便在面前如張弓十分滿  
而不發箭箭雖不發然已知真箇是中這物事了○孟  
須是精一其心無些子他慮夾雜方看得出來

子曰天下有道以道殉身天下無道以身殉道

殉如殉葬之殉

以死隨物之名也身出則道在必行道  
屈則身在必退以死相從而不離也

未聞以道殉乎

人者也

以道從人  
妾婦之道

○公都子曰滕更之在門也若在所

禮而不答何也

更平聲○趙氏曰滕更  
滕君之弟來學者也

孟子曰挾貴而

問挾賢而問挾長而問挾有勲勞而問挾故而問皆所

不答也。膝更有二焉。

長上聲。○趙氏曰：二謂扶貴扶賢也。○尹氏曰：有所扶則受道之心。

不專所以不答也。○此言君子雖誨人不倦，又惡夫意之不誠者。

○孟子曰：於不可已

而已者，無所不已於所厚者，薄無所不薄也。

已止也。不可止謂所

不得不為者也。所厚所當厚者也。此言不及者之弊。

其進銳者，其退速。

進銳者用心太過其

氣易衰，故退速。○三者之弊，理勢必然。雖過不及之不同，然卒同歸於廢弛。○集疏曰：模按大學曰：其所厚者薄，而其所薄者厚，未之有也。朱子曰：厚薄是以家對國言之。又曰：所厚者謂父子兄弟骨肉之恩理之所當然，而人心之不能已者。又曰：進銳退速，其病正在意氣方盛之時，已有易衰之勢，不待意氣已衰之後，然後見其失。○孟子曰：君子之於物也愛之，而弗仁於民也，仁之

而弗親親而仁民仁民而愛物

物謂禽獸草木愛謂取之有時用之有節

○程子曰仁推己及人如老吾老以及人之老於民則可於物則不可統而言之則皆仁分而言之則有序楊氏曰其分不同故所施不能無差等所謂理一而分殊者也尹氏曰何以有是差等一本故也無偽也○集疏曰朱子曰仁如水之源孝弟是水流底第一坎仁民是第二坎愛物則第三坎也詳見論語學而篇第二章集疏

○孟子曰知者無不知也當務之為急仁者無不愛

也急親賢之為務堯舜之知而不徧物急先務也堯舜

之仁不徧愛人急親賢也

知者之知並去聲○知者固無不知然常以所當務者為

急則事無不治而其為知也大矣仁者固無不愛不能然常急於親賢則恩無不洽而其為人博矣

三年之喪而總小功之察放飯流歠而問無齒決是之

謂不知務

飯扶晚反歠昌悅反○三年之喪服之重者也總麻三月小功五月服之輕者也察致詳

也放飯大飯流歠長歠不敬之大者也齒決齧斷乾肉不敬之小者也問講求之意○此章言君子之於道識

其全體則心不狹知所先後則事有序豐氏曰智不急於先務雖徧知人之所知徧能人之所能徒弊精神而

無益於天下之治矣仁不急於親賢雖有仁民愛物之心小人在位無由下達聰明日蔽於上而惡政日加於

下此孟子所謂不知務也○集疏曰問不能三年之喪而總小功之察放飯流歠而問無齒決是之謂不知務

却止說智不說仁如何朱子曰便是併與仁說所謂急親賢之為務豈不為仁乎又曰學者亦有當務學者須

要窮究源本既得其大者則小小文義自是該通若只於淺處用功則必不免湛滯之患

孟子集疏卷十三

欽定四庫全書

孟子集疏卷十四

宋 蔡模 撰

盡心章句下

凡三十  
八章

孟子曰不仁哉梁惠王也仁者以其所愛及其所不愛

不仁者以其所不愛及其所愛

親親而仁民仁民而愛物所謂以其所愛及其

所不愛也

公孫丑曰何謂也梁惠王以土地之故糜爛其民

而戰之大敗將復之恐不能勝故驅其所愛子弟以殉

之是之謂以其所不愛及其所愛也

梁惠王以下孟子答辭也糜爛其民

使之戰鬪糜爛其血肉也復之復戰也子弟謂太子申也  
以土地之故及其民以民之故及其子皆以其所不  
愛及其所愛也○此承前篇之末三章之意○孟子曰  
言仁人之恩自內及外不仁之禍由疎逮親○孟子曰

春秋無義戰彼善於此則有之矣

春秋每書諸侯戰伐之事必加譏貶以著

其擅興之罪無有以為合於義而許之者但就征者上  
中彼善於此者則有之如召陵之師之類是也

伐下也敵國不相征也

征所以正人也諸侯有罪則天子討而正之此春秋所以無義

戰也○孟子曰盡信書不如無書

程子曰載事之辭容有重稱而過其實者學者

當識其義而已苟執於辭則時或有害於義不如無書之愈也

吾於武成取二三策而

已矣

武成周書篇名武王伐紂歸而記事之書也策竹簡也取其二三策之言其餘不可盡信也程子曰



取其奉天伐暴之意  
反政施仁之法而已  
仁人無敵於天下以至仁伐至不

仁而何其血之流杵也

杵春杵也或作鹵楯也武成言武王伐紂紂之前徒倒戈攻于

後以北血流漂杵孟子言此則其不可信者然書本意乃謂商人自相殺非謂武王殺之也孟子之設是言懼後世之惑且長不仁之心耳○集疏曰張子曰不以文害辭不以辭害意此教人讀詩法也吾於武成取二三策而已此教人讀書法也或問血流漂杵乃紂之前徒倒戈之所為荀子以為殺者皆商人非周人者是也而孟子不之信何哉朱子曰此亦拔本塞源之論蓋雖殺者非我而亦不忍言也程子以為孟子設為是言蓋得其微意矣余隱之云魯語曰俎豆之事則嘗聞之矣軍旅之事未之學也孔子之意可見矣客有問陶弘景註易與本草孰先陶曰註易誤不至殺人註本草誤則有不得其死者世以為知言唐子西嘗曰弘景知本草而

未知經註本草誤其禍疾而小註六經誤其禍遲而大  
前世儒臣引經誤國其禍至於伏尸百萬流血千里武  
成曰血流漂杵武王以此自多之辭當時倒戈攻後殺  
傷固多非止一處豈至血流漂杵乎孟子深慮戰國之  
君以此藉口故曰盡信書則不如無書而謂血流漂杵  
未足為多豈示訓之意哉經註之禍正此類也反以孟  
子為畔經○孟子曰有人曰我善為陳我善為戰大罪

也陳去聲○制行伍國君好仁天下無敵焉好去聲南面

而征北狄怨東面而征西夷怨曰奚為後我此引湯之事以明之

解見前篇武王之伐殷也革車三百兩虎賁三千人兩去聲賁音奔

○又以武王之事明之也兩車數一車兩輪也千書序作百王曰無畏寧爾也非敵

百姓也若崩厥角稽首

書泰誓文與此小異孟子之意當云王謂商人曰無畏我也我

來伐紂本為安寧汝非敵商之百姓也於是商人稽首至地如角之崩也征之為言正也各

欲正己也焉用戰

焉於虔反○民為暴君所虐皆欲仁者來正己之國也

○孟子

曰梓匠輪輿能與人規矩不能使人巧

尹氏曰規矩法度可告者也巧

則在其人雖大匠亦末如之何也已蓋下學可以言傳上達必由心悟莊周所論斲輪之意蓋如此○孟

子曰舜之飯糗如草也若將終身焉及其為天子也被

衿衣鼓琴二女果若固有之

飯上聲糗去久反茹音汝衿之忍反果說文作裸鳥

果反○飯食也糗乾糲也茹亦食也衿畫衣也二女堯二女也果女侍也言聖人之心不以貧賤而有慕於外

不以富貴而有動於中，隨遇而安，無預於己所性分定故也。○集疏曰：問果為女侍，朱子曰：愚嘗推究廣韻從女從果者，○孟子曰：吾今而後知殺人親之重也。殺人亦曰侍也。

之父人亦殺其父，殺人之兄人亦殺其兄，然則非自殺

之也，一間耳。

間去聲。○言吾今而後知者，必有所為而感發也。一間者，我往彼來間一人耳。其實

與自害其親無異也。范氏曰：知此則愛敬人之親人亦愛敬其親矣。○孟子曰：古之為關

也將以禦暴。

識察非常

今之為關也將以為暴。

征稅出入。○范氏曰：古之

耕者什一，後世或收大半之稅，此以賦斂為暴也。文王之囿與民同之，齊宣王之囿為阱，國中此以園囿為暴也。後世為暴不止於關，若使孟子用於諸侯，○孟子曰：必行文王之政，凡此之類皆不終日而改也。

身不行道不行於妻子使人不以道不能行於妻子

身不

行道者以行言之不行者道不行也使人不以道者以事言之不能行者令不行也○集疏曰問上不行於妻子百事不可行不可使亦在其中下不行於妻子却只指使人一事言之否朱子曰然○孟子曰

周于利者凶年不能殺周于德者邪世不能亂

周足也言積之

厚則用有餘

○孟子曰好名之人能讓千乘之國苟非其人

簞食豆羹見於色

好乘食皆去聲見音現○好名之人矯情干譽是以能讓千乘之國然若

本非能輕富貴之人則於得失之小者反不覺其真情之發見矣蓋觀人不於其所勉而於其所忽然後可以見其所安之實也○集疏曰或問好名之人能讓國矣而不能忘情於小物何哉朱子曰千乘之國辭受之間

十目所視十手所指之地也。算食豆羹得失之際則微矣。人亦何暇注其耳目於斯哉。此好名之士所以飾情於彼以取美名而不意其鄙吝之真情實態乃發露於所忽易而不虞之地也。又曰能讓千乘之國唯賢人能之。好名之人亦有時而能之。然於小處不覺發見矣。蓋好名之人本非真能讓國也。徒出一時之慕名而勉強為之爾。然這邊雖能讓千乘之國那邊軍食豆羹必見於色。蘇氏所謂人能碎千金之璧而不能不失聲於破釜正此意也。苟非其人其人指真能讓國者非指好名之人也。又曰把此一段對向為身死而不受一段。好名之心勝者是大處打得過小處漏綻也。動○孟子曰不於萬鍾者是小處遮掩得過大處發露也。

信仁賢則國空虛

空虛言若無人然

無禮義則上下亂

禮義所以辨上

下定無政事則財用不足

生之無道取之無度用之無節故也。尹氏曰三者以仁賢

為本無仁賢則禮義政事處之皆不以其道矣○孟子曰不仁而得國者有之

矣不仁而得天下未之有也

言不仁之人騁其私智可以盜千乘之國而不可以

得丘民之心鄒氏曰自秦以來不仁而得天下者有矣然皆一再傳而失之猶不得也所謂得天下者必如三

代而後可

○孟子曰民為貴社稷次之君為輕

社土神稷穀神建國則立

壇壝以祀之蓋國以民為本社稷亦為民而立而君之尊又係於二者之存亡故其輕重如此是故得

乎丘民而為天子得乎天子為諸侯得乎諸侯為大夫

丘民田野之民至微賤也然得其心則天下歸之天子至尊貴也而得其心者不過為諸侯耳是民為重也

諸侯危社稷則變置

諸侯無道將使社稷為人所滅則當更立賢君是君輕於社稷也

犧牲既盛粢盛既潔祭祀以時然而旱乾水溢則變置

社稷

咸音成○祭祀不失禮而土穀之神不能為民禦災捍患則毀其壇壝而更置之亦年不順成八蜡

不通之意是社稷雖重於君而輕於民也○集疏曰或問民貴君輕之說朱子曰以理言之則民貴以分言之則君貴此固兼行而不悖也各於其時視其輕重之所在而已爾問伊川云句龍配食於社棄配食於稷始以其有功於水土故祀之今以其水旱故易之夫以一時之災而遽廢萬世之功可乎曰變置社稷非謂易其人而祀之蓋言遷社稷壇場於他方所耳又曰集註變置社稷出於彭城陳無己之論曰有為句容今多盜改置社稷而加禮焉既而盜止竊以為此或

○孟子曰聖人百

世之師也伯夷柳下惠是也故聞伯夷之風者頑夫廉



懦夫有立志聞柳下惠之風者薄夫敦鄙夫寬奮乎百

世之上句百世之下聞者莫不興起也非聖人而能若

是乎而況於親炙之者乎

興起感動奮發也親炙親近而熏炙之也餘見前篇○集

疏曰或問孟子學孔子者也乃屢稱夷惠而深歎仰之何邪朱子曰夷惠之行高矣然偏勝而易能有迹而易見且世人之貪懦鄙薄者衆一聞其風而興起焉則其為效也速而所及者廣譬如薑桂大黃之劑雖非中和然其於去病之功為捷而田夫販婦大寒大熱者之所便也若孔子之道則廣大而中正渾然而無迹非深於道者不能庶幾其萬一如參苓芝朮之為藥平居有養性之益而緩急伐病之功未必優於薑桂大黃非所以施於閭巷之間危惡之候也孟子屢稱夷惠而不及於孔子其殆以此邪又記東溪高彥先祠曰孟子之論二

子詳矣雖或以為聖之清或以為聖之和然又嘗病其隘與不恭且以其道不同於孔子而不願學也及其一旦慨然發為此論乃以百世之師歸之而孔子反不與焉何哉孔子道大德中而無迹故學之者沒身鑽仰而不足二子志潔行高而迹著故慕之者一日感慨而有餘也○孟子曰仁也者人也

合而言之道也

仁者人之所以為人之理也然仁理也人物也以仁之理合於人之身而言之

乃所謂道者也程子曰中庸所謂率性之謂道是也○或曰外國本人也之下有義也者宜也禮也者履也智也者知也信也者實也凡二十字今按如此則理極分明然未詳其是否也○集疏曰或問此章之說朱子曰孟子此章但論仁與道之所以名耳故本文以言之為說程子亦以率性謂道道是總名釋之也蓋言人而不及仁則血氣物欲之私而已言仁而不即人之身以明之則又徒為虛言而無以見天理流行之實故必以仁

之理合於人之身而言然後仁之為道可見蓋仁則性而已矣道則父子之親君臣之分見於人之身而尤著程子所謂公而以人體之亦此意也又曰人之所以得名以其仁也言仁而不言人則不見理之所寓言人而不言仁則人不過是一塊血肉耳必合而言之方見得道理出來又曰仁者是人底道理就人身上體認出及就人上說則謂之道也又曰中庸仁者人也是對義者宜也意又不同中庸是切已言之孟子是統而言之

○孟子曰孔子之去魯曰遲遲吾行也去父母國之道也去齊接淅而行去他國之道也重出○孟子曰君子之

危於陳蔡之間無上下之交也

君子孔子曰危與厄同君臣皆惡無所與交也

○貉稽曰稽大不理於口

貉音陌○趙氏曰貉姓稽名為衆口所訛理賴也今按漢

書無俚方

孟子曰無傷也士憎茲多口

趙氏曰為士者益多為衆口所

訕按此則憎當從土今

詩云憂心悄悄愠于羣小孔子

也肆不殄厥愠亦不殞厥問文王也

詩邶風柏舟及大雅縣之篇也悄悄

憂貌愠怒也本言衛之仁人見怒于羣小孟子以為孔子之事可以當之肆發語辭殞墜也問聲問也太言大王事昆夷雖不能殄絕其愠怒亦不自墜其聲問之美孟子以為文王之事可以當之尹氏曰言人顧自處如何盡其在我者而已○集疏曰朱子曰如○孟子曰賢見惡於叔孫幾害於桓魋皆愠于羣小也○孟子曰賢

者以其昭昭使人昭昭今以其昏昏使人昭昭

昭昭明也昏昏

闇也尹氏曰大學之道在自昭明德而施於天下國家其有不順者寡矣

○孟子謂高子曰

山徑之蹊間句介然用之而成路句為間不用則茅塞

之矣今茅塞子之心矣

介音戛○徑小路也蹊人行處也介然條然之頃也用由也路

大路也為間少頃也茅塞茅草生而塞之也言理義之心不可少有間斷也

○高子曰禹之

聲尚文王之聲

尚加尚也豐氏曰言禹之樂過於文王之樂

孟子曰何以言

之曰以追蠡

追音堆蠡音禮○豐氏曰追鐘鈕也周禮所謂旋蠡是也蠡者蓄木蟲也言禹時鐘

在者鐘鈕如蟲齧而欲絕蓋用之者多而文王之鐘不然是以知禹之樂過於文王之樂也

曰是奚

足哉城門之軌兩馬之力與

與平聲○豐氏曰奚足言此何足以知之也軌車轍

迹也兩馬一車所駕也城中之塗容九軌車可散行故其轍迹淺城門惟容一車車皆由之故其轍迹深蓋日

久車多所致非一車兩馬之力能使之然也言禹在文王前千餘年故鐘久而鈕絕文王之鐘則未久而鈕全不可以此而議優劣也○此章文義本不可曉舊說相承如此而豐氏差明白故今存之亦未知其是否也○集疏曰尹氏曰城門之軌豈兩馬之力哉○齊饑陳臻歲久而用之多也高子以追蠡言之失矣○

曰國人皆以夫子將復為發棠殆不可復

復扶又反○先時齊國嘗

饑孟子勸王發棠邑之倉以振貧窮至此又饑陳臻問言齊人望孟子復勸王發棠而又自言恐其不可也

孟子曰是為馮婦也晉人有馮婦者善搏虎卒為善士

則之野有衆逐虎虎負嵎莫之敢撓望見馮婦趨而

迎之馮婦攘臂下車衆皆悅之其為士者笑之

手執曰搏卒為

善士後能改行為善也之適也負依也山曲曰隅櫻觸也笑之笑其不知止也疑此時齊王已不能用孟子而孟子亦將去矣故其言如此○集疏曰范氏曰孟子在賓師之位以仁義說齊王幸而聽其言故發棠邑之粟然而不行王政孟子言終不合及○孟子曰口之於味再饑遂不復言度其不可言也

也目之於色也耳之於聲也鼻之於臭也四肢之於安

佚也性也有命焉君子不謂性也程子曰五者之欲性也然有分不能皆如

其願則是命也不可謂我性之所有而求必得之也愚按不能皆如其願不止為貧賤蓋雖富貴之極亦有品節限制則是亦有命也○集疏曰朱子曰如紂仁之於之酒池肉林是富貴之極而不知限節之意

父子也義之於君臣也禮之於賓主也智之於賢者也

聖人之於天道也命也有性焉君子不謂命也

程子曰仁義禮

智天道在人則賦於命者所稟有厚薄清濁然而性善可學而盡故不謂之命也張子曰晏嬰智矣而不知仲尼是非命邪愚按所稟者厚而清則其仁之於父子也至義之於君臣也盡禮之於賓主也恭智之於賢否也哲聖人之於天道也無不脗合而純亦不已焉薄而濁則反是是昏所謂命也或曰者當作否人衍字更詳之○愚聞之師曰此二條者皆性之所有而命於天者也然世之人以前五者為性雖有不得而必欲求之以後五者為命一有不至則不復致力故孟子各就其重處言之以伸此而抑彼也張子所謂養則付命於天道則責成於已其言約而盡矣○集疏曰或問此章之說所謂性命者何不同也朱子曰性者人之所受乎天者其體則不過仁義禮智之理而已其發則雖食色意欲之私亦無不本於是焉命則因夫氣之厚薄而賦於人之



名也不惟智愚賢否之所繫雖貧富貴賤之所值亦無不由於是也故君子以食色意欲之私則不謂之性而安於貧賤富貴之有命於智愚賢否之殊則不謂之命而勉於仁義禮智之有性也或說以五者之命皆為所值之不同如舜之於瞽瞍則仁或不得於父子文王之於紂則義或不得於君臣孔子之於陽貨則禮或不得於賓主子貢不能聞一知十則智或不得於賢者孔子不得聖人之位則聖人或不得於天道此皆命也然君子當勉其在己者而不歸之命其義亦通又曰聖人之於天道如堯舜則是性之湯武則是身之禹則入聖域而不優是合下所稟有清濁而所造有淺深不同如夫子不得位文王囚羑里此是合下所稟有厚薄而所遇有應不應但其命雖如此又有性焉故當盡性大抵孟子此語各就其所重言之所以伸此而抑彼又曰晏嬰知矣不知仲尼豈非命邪此命字恐作兩樣看若作所稟之命則是晏嬰稟得智之淺者若作命分之命則晏

子偶然蔽於此遂不識夫子又曰有命焉有性焉此命與性字是就理上說性也君子不謂性命也君子不謂命此性字與命字是就氣上說又曰口之於味目之於色耳之於聲鼻之於臭四肢之於安佚固是性然亦便是合下賦予之命仁之於父子義之於君臣禮之於賓主智之於賢者聖人之於天道固是命然亦便是各得其所受之理便是性孟子恐人只見得一邊故就其所主而言舜禹相授受只說人心惟危道心惟微只一箇心只就所主而言人心如口之於味目之於色耳之於聲鼻之於臭四肢之於安佚若以為性所當然一向惟意所欲却不可蓋有命存焉道心如仁之於父子義之於君臣禮之於賓主智之於賢者聖人之於天道若以為命已前定任其如何更不盡心却不可蓋有性焉須著盡此心以求合乎理始得又曰上云性也是氣稟之性有命焉是斷制人心欲其不敢過也下云命也蓋其所受氣稟亦有厚薄之不齊有性焉是充滿道心欲其

無不及也又曰此章只要逼人欲長天理前一節人以  
為性我所有須要必得後一節人以為命則在天多委  
之而不顧所以孟子到入說性處  
却說有命人說命處却說有性  
○浩生不害問曰樂

正子何人也孟子曰善人也信人也趙氏曰浩生姓何

謂善何謂信不害問也曰可欲之謂善天下之理其善者必

其為人也可欲而不有諸己之謂信凡所謂善皆實有

好色是則可謂信人矣張子曰志之如惡惡臭如好

仁無惡之謂善誠善於身之謂信充實之謂美力行其

充滿而積實則美在充實而有光輝之謂大和順積中

外美在其中而暢於四支發於大面化之之謂聖大而

事業則德業至盛而不可加矣能化

欽定四庫全書

使其大者泯然無復可見之迹則不思不勉從容中道而非人力之所能為矣張子曰大可為也化不可為也在熟之聖而不可知之謂神程子曰聖不可知謂聖而已矣

聖人之上又有樂正子二之中四之下也蓋在善信之間觀其從於

子教則其有諸己者或未實也張子曰顏淵樂正子皆知好仁矣樂正子志仁無惡而不致於學所以但為善人信人而已顏子好學不倦合仁與智具體聖人獨未至聖人之止耳程子曰士之所難者在有諸己而已能有諸己則居之安資之深而美且大可以馴致矣徒知可欲之善而若存若亡而已則能不受變於俗者鮮矣尹氏曰自可欲之善至於聖而不可知之神上下一理擴充之至於神則不可得而名矣○集疏曰或問此章之說朱子曰善者人之所欲惡者人之所惡其為人處心造事行已接物凡其所欲為一皆可欲而不可惡則

是可謂善人矣然此或其天資之美或其知及而勉慕  
焉未必其真以為然而果能不失也必其用力之久一  
旦脫然有以真知其善之在己而不得不然決定真實  
而無一毫虛偽之意然後可以謂之信人矣然亦足以  
自信於心而已未必其行之充足飽滿而無慊於身也  
然既信之則其行必力其守必固如是而不可已焉則  
其所有之善充足飽滿於其身雖其隱微曲折之間亦  
皆清和純懿而無不善之雜是則所謂美人者也然亦  
足以充於其內而已而未必其能發見於外也又如是  
而不已焉則其善之充於內者彌滿布濩洋溢四出而  
不可禦其在躬也則晬面盎背而施於四體其在事也  
則德盛仁熟而天下文明是則所謂大人者也然大而  
不化則所謂大者未能離乎方體形迹之間必其德之  
盛者日益盛仁之熟者日益熟則向之所謂大者且將  
春融凍解渾然無迹而與天地合德日月合明四時合  
序鬼神合吉凶矣是則所謂聖人者也至於是則造道

入德之功至矣盡矣不可以有加矣是其盛德至善之極無聲無臭之妙必有非耳目所能割心思所能測者是則所謂神者而非聖人之上復有神人也夫自可欲而至於大則思勉之所及也至於聖且神焉則雖非思勉之所及然非思勉之而不已焉則亦未有至焉者也又曰有可欲之善然後能有諸己而充實將去若無可欲者則充實簡恣物譬如必先討得真實藥材然後修製以至為丸為散若是藥材不真雖百般羅碾畢竟不是答張敬夫曰此六位為六等人耳今所謂善者乃指其理而非目其人之言矣與後五位文意不同又舊說信為自信之意今按此六位皆他人指而名之之辭然則亦不得為自信之信矣問樂正子以善名矣而以鋪歆從子教先館舍後長者何也曰言在二者之中有餘於善而不足於信矣黃氏云學之所造有淺深則德之所至有高下聖賢推明其序使學者循而進焉其望斯世亦至矣由善而信由信而美以至於大為聖為神

夫聖神者豈常人之所敢望哉孟子當戰國之際其告人者不曰堯舜則曰湯武豈固強人以其所不能哉蓋人性皆善聖神者亦全吾性之所固有耳學者豈以不能為患哉患不為也雖然聖人固可學也而乃始之以可欲之謂善何哉此孟子指其至易曉者而示人以入道之門也蓋學者入道之初將以決其所趨向不必他求也求之於可欲不可欲之間而已今有人焉孝弟忠信樂善不倦不惟吾之所欲而人亦以為可欲也不仁不智無禮無義不惟人以為可惡而吾亦自知其可惡也學者反而思之凡吾言行之間果可欲乎果可惡乎從其所可欲捨其所可惡斯可以為善人矣由是而進焉雖聖神可為也又曰無欲其所不欲如斯而已矣亦此意也勉之以人之所難能而曉之以人之所易知聖賢之望於學者如此而學者顧不思焉其亦可歎也哉

○孟子曰逃墨必歸於楊逃楊必歸於儒歸斯受之而

已矣

墨氏務外而不情楊氏太簡而近實故其反正之漸大畧如此歸斯受之者憫其陷溺之久而取其

悔悟之新也

今之與楊墨辯者如追放豚既入其豎又從而

招之

放豚放逸之豕豚也豎闌也招罥也羈其足也言彼既來歸而又追咎其既往之失也○此章見聖

賢之於異端距之甚嚴而於其來歸待之甚恕距之嚴故人知彼說之為邪待之恕故人知此道之可反仁之至義之盡也○罥古縣反○集疏曰朱子曰楊墨皆是邪說無大輕重但墨氏之說尤出於矯偽不近人情而難行故孟子之言如此

○孟子曰有布縷之征粟米之

非以楊氏為可取也

征力役之征君子用其一緩其二用其二而民有殍用

其三而父子離

征賦之法歲有常數然布縷取之於夏粟米取之於秋力役取之於冬當各以



其時若并取之則民力有所不堪矣今兩稅三限之法亦此意也尹氏曰言民為邦本取之無度則其國危矣

○孟子曰諸侯之寶三土地人民政事寶珠玉者殃必

及身

尹氏曰言寶得其寶者安寶失其寶者危

○盆成括仕於齊孟子曰死

矣盆成括盆成括見殺門人問曰夫子何以知其將見

殺曰其為人也小有才未聞君子之大道也則足以殺

其軀而已矣

盆成姓括名也恃才妄作所以取禍徐氏曰君子道其常而已括有死之道焉設使

幸而獲免孟子之言猶信也

○孟子之滕館於上宮有業屨於牖上

館人求之弗得

館舍也上宮別宮名業屨織之有次業而未成者蓋館人所作置之牖上而失

也或問之曰若是乎從者之廢也曰子以是為竊屨來

與曰殆非也夫子之設科也往者不追來者不距苟以

是心至斯受之而已矣

從為並去聲與平聲夫子如字舊讀為扶余者非○或問之者

問於孟子也廢匿也言子之從者乃匿人之物如此乎孟子答之而或人自悟其失因言此從者固不為竊屨而來但夫子設置科條以待學者苟以向道之心而來則受之耳雖夫子亦不能保其往也門人取其言有合於聖賢之指故記之○集疏曰或問此章之說朱子曰夫子設科以下舊說以為孟子之言而讀子為予則失之矣又有以為此章皆或者與館人問答之詞恐亦或有此理○孟子曰人皆有所不

忍達之於其所忍仁也人皆有所不為達之於其所為

義也

惻隱羞惡之心人皆有之故莫不有所不忍不為此仁義之端也然以氣質之偏物欲之蔽則於他

事或有不能者但推所能達之於所不能則無非仁義矣人能充無欲害人之心而

仁不可勝用也能充無穿踰之心而義不可勝用也

勝平聲○充滿也穿穿穴踰踰牆皆為盜之事也能推所不忍以達於所忍則能滿其無欲害人之心而無不

仁矣能推其所不為以達於所為則人能充無受爾汝

之實無所往而不為義也

此申說上文充無穿踰之心之意也蓋爾汝人所輕賤之

稱人雖或有所貪昧隱忍而甘受之者然其中心必有慚忿而不肯受之之實人能即此而推之使其充滿無所虧缺則無士未可以言而言是以言餽之也可以言

適而非義矣

而不言是以不言餽之也是皆穿踰之類也

餽音忝○餽探取之

也今人以舌取物曰餽即此意也便佞隱默皆有意探取於是亦穿踰之類然其事隱微人所忽易故特舉以見例明必推無穿踰之心以達於此而悉去之然後為能充其無穿踰之心也○集疏曰朱子曰此章舊時解得是却因後來改來改去不分曉了看來實字對名字說不欲人以爾汝之稱加諸我是惡爾汝之名也然反之於身而去其無可爾汝之行是能充其無受爾汝之實也若我身有未是處則雖惡人以爾汝相稱亦自有所愧矣又曰餽是鉤致之意如本不必說自家却強說幾句要去動人要人去悅人是以言餽之也如合當與他說須故為要難要使他來問我是以不言餽之也不直心而私意如此便是穿踰之類又云裏面是如此外面却不如此外面恁地裏面却不恁地問此章先言仁義而後專言義何也曰仁只是一路義却頭項多問人

能充無穿踰之心是就至粗處說以言餉以不言餉是說入至細處否曰然能充無受爾汝之實處工夫却甚大了到這田地時大段周密了○孟子曰言近而指遠所以說無所往而不為義也

者善言也守約而施博者善道也君子之言也不下帶

而道存焉

施去聲○古人視不下於帶則帶之上乃目前常見至近之處也舉目前之近事而至理

存焉所以為言近而指遠也

君子之守修其身而天下平

此所謂守約而施博

也人病舍其田而芸人之田所求於人者重而所以自

任者輕

舍音捨○此言不守約而務博施之病○集疏曰或問此章之說朱子曰不知道者務為高遠

之言則固荒唐而無餘味然欲其近則又鄙淺而無深遠之趣也不知約之可守則固泛濫而不仁矣然欲其

約則又隘狹而無廣博之功然則所謂善言善道者非有道之君子其孰能知之乎○孟子曰堯

舜性者也湯武反之也

性者得全於天無所汙壞不假修為聖之至也反之者修為以

復其性而至於聖人也程子曰性之反之古未有此語蓋自孟子發之呂氏曰無意而安行性也有意利行而至於無意復性者也堯舜不失其性湯武善反其性及其成功則一也○集疏曰呂氏註無意而安行性也性下合添之動容周旋中禮者盛德之至也哭死而哀非者二字

為生者也經德不回非以干祿也言語必信非以正行

也中為行並去聲○細微曲折無不中禮乃其盛德之至自然而中而非有意於中也經常也回曲也三者亦皆自然而然非有意而為之也皆聖人之事性之德也君子行法以俟命而已

矣

法者天理之當然者也君子行之而吉凶禍福有所不計蓋雖未至於自然而已非有所為而為矣此反

之之事董子所謂正其義不謀其利明其道不計其功正此意也程子曰動容周旋中禮者盛德之至行法以俟命者朝聞道夕死可矣之意也呂氏曰法由此立命由此出聖人也行法以俟命君子也聖人性之君子所以復其性也○集疏曰程子曰堯與舜更無優劣及至湯武便別孟子言性之反之自古無人如此說只是孟子分別出來便知得堯舜是生而知之湯武是學而能之文王之德則似堯舜禹之德則似湯武要之皆是聖人或問此章之說朱子曰程子至矣其論堯舜禹湯文武一條尤有功其所謂動容周旋中禮盛德之至者兼夫經德不回以下而言聖人之事也行法俟命朝聞夕死者以言近學之方也此其等級明矣行法以俟命者則是理也三代以降惟董子嘗言之而諸葛武侯言於其君有曰臣鞠躬盡力死而後已至於成敗利鈍非臣

之明所能逆覩也程子語其門人有曰今容貌必端言語必正非欲獨善其身以求知於人但天理當然亦曰循之而已此三言者所指雖殊要皆行法俟命之意外此則亦寂寥而無聞矣斯道之傳不傳考之於此其亦可見也夫又曰聖人是人與法為一已與天為一學者是人未與法為一已未與天為一故須行法以俟命也

○孟子曰說大人則藐之勿視其巍巍然

說音藐藐音眇○趙氏曰

大人當時尊貴者也藐輕之也巍巍富貴高顯之貌藐焉而不畏之則志意舒展言語得盡也堂高數

仞榱題數尺我得志弗為也食前方丈侍妾數百人我得志弗為也般樂飲酒驅騁田獵後車千乘我得志弗為也在彼者皆我所不為也在我者皆古之制也吾何



畏彼哉

椽楚危反般音盤樂音洛乘去聲○椽猶也題頭也食前方丈饌食列於前者方一丈也此皆

其所謂巍巍然者我雖得志有所不為而所守者皆古聖賢之法則彼之巍巍者何足道哉楊氏曰孟子此章以已之長方人之短猶有此等氣象在孔子則無此矣○集疏曰或問孔子畏大人而孟子藐之何也朱子曰孟子之藐大人者不視其巍巍然者而已矣故雖不肯枉尺而直尋而齊人之所敬王莫孟子如也特以當世之士以道徇人內無所守故特發此以立其志使其意氣舒展無所懾懼而得以盡其所言耳若夫君子以禮存心固將無所不用其敬豈特於大人而反藐之哉又曰大人固當畏而所謂藐者乃是藐他堂高數仞之類耳這為世上人把大人許多崇高富貴當事有言不敢出諸口故孟子云爾問說大人則藐之蓋主於說而言如曰見大人則藐之○孟子曰養心莫善於寡欲其為則失之矣白得之

人也寡欲雖有不存焉者寡矣其為人也多欲雖有存

焉者寡矣

欲如口鼻耳目四支之欲雖人之所不能無然多而不節未有不失其本心者學者所當

深戒也程子曰所欲不必沉溺只有所向便是欲○集疏曰呂侍講云天下之難持者莫如心天下之易染者莫如欲朱子曰孟子只是言天理人欲相為消長分數其為人也寡欲則人欲分數少故雖有不存焉者寡矣不存者寡則天理分數多也其為人也多欲則人欲分數多故雖有存焉者寡矣存焉者寡則是天理分數少也又曰多字對寡字說纔要多些子便是欲若眼前事

事貪要時這心便一齊走出了未便說到邪僻不好底物事只是眼前底事纔多欲便將本心都紛雜了只減少便漸存得此心又曰周子言寡欲以至於無蓋恐人

以寡欲為便得了故言不止於寡欲而已必至於無然後可然無底工夫則由於能寡欲到無欲非聖人不能

也黃氏云孟子嘗言求放心矣又言存其心矣操之則存舍之則亡心之存亡決於操舍而又曰莫善於寡欲何也人惟一心攻之者衆聲色臭味交乎外榮辱利害動乎內隨感而應無有窮已則清明純一之體又安能保其常存而不放哉出門如賓承事如祭夫子之告仲弓操存之謂也非禮勿視非禮勿聽非禮勿言非禮勿動夫子之告顏子寡欲之謂也二子之問仁則同而夫子告之之異者豈其所到固有淺深歟高城深池重門擊柝固足以自守矣內姦外宄投隙伺便一有少懈而乘之者至矣良將勁卒堅甲利兵掃除妖氛而乾清坤夷此孟子發明操存之說而又以為莫善於寡欲也雖然寡欲固善矣然非真知天理人欲之分則何以施其克治之功哉故格物致知又所以為寡欲之要此又學者之所當察也模謂此章孟子教學者存心之要法周子推之曰養心不止於寡而存耳蓋寡焉以至於無則誠立明通此是周子發聖賢此心體用之妙然學者若

真能寡欲存其本心久而不失則亦誠立而  
實體安固明通而實用流行不可以不勉也○曾皙嗜

羊棗而曾子不忍食羊棗

羊棗實小黑而圓又謂之羊矢棗曾子以父嗜之父沒之

後食必思親故不忍食也

公孫丑問曰膾炙與羊棗孰美孟子曰膾

炙哉公孫丑曰然則曾子何為食膾炙而不食羊棗曰

膾炙所同也羊棗所獨也諱名不諱姓姓所同也名所

獨也

肉聶而切之為膾炙炙肉也

○萬章問曰孔子在陳曰盍歸乎

來吾黨之士狂簡進取不忘其初孔子在陳何思魯之

狂士

盍何不也狂簡謂志大而畧於事進取謂求望高遠不忘其初謂不能改其舊也此語與論語小異

孟子曰孔子不得中道而與之必也狂獯乎狂者進取

獯者有所不為也孔子豈不欲中道哉不可必得故思

其次也

獯音緇○不得中道至有所不為據論語亦孔子之言然則孔子字下當有曰字論語道作行

獯作狷有所不為者知恥自好不為不善之人也孔子豈不欲中道以下孟子言也○集疏曰朱子曰狂者知之過獯者行之過模按論語公冶長篇曰子在陳曰歸與歸與吾黨之小子狂簡斐然成章不知所以裁之

敢問何如斯可謂狂矣

萬章問

曰如琴張曾皙牧皮者孔

子之所謂狂矣

琴張名牢字子張子桑戶死琴張臨其喪而歌事見莊子雖未必盡然要必有

近似者曾皙見前篇季武子死曾皙倚其門而歌事見檀弓又言志異乎三子者之撰事見論語牧皮未詳

何以謂之狂也

萬章問

曰其志嚶嚶然曰古之人古之人

夷考其行而不掩焉者也

嚶火交反行去聲○嚶嚶志大言大也重言古之人見其

動輒稱之不一稱而已也夷平也掩覆也言平考其行而不能覆其言也程子曰曾皙言志而夫子與之蓋與聖人之志同便是堯舜氣象也特行有不掩焉耳此所謂狂也狂者又不可得欲得不

屑不潔之士而與之是獯也是又其次也

此因上文所引遂解所以

思得獯者之意狂有志者也獯有守者也有志者能進於道有守者不失其身屑潔也

孔子曰過

我門而不入我室我不憾焉者其惟鄉原乎鄉原德之

賊也曰何如斯可謂之鄉原矣

鄉原非有識者原與愿同荀子原慤字皆讀作

愿謂謹愿之人也故鄉里所謂愿人謂之鄉原孔子以其似德而非德故以為德之賊過門不入而不恨之以其不見親就為幸深惡而痛絕之也萬章又引孔子之言而問也曰何以是嚶嚶也言

不顧行行不顧言則曰古之人古之人行何為踴踴涼

涼生斯世也為斯世也善斯可矣閹然媚於世也者是

鄉原也

行去聲踴其禹反閹音奄○踴踴獨行不進之貌涼涼薄也不見親厚於人也鄉原譏狂者曰

何用如此嚶嚶然行不掩其言而徒每事必稱古人邪又譏狷者曰何必如此踴踴涼涼無所親厚哉人既生於此世則當但為此世之人使當世之人皆以為善則可矣此鄉原之志也閹如奄人之奄閉藏之意也媚求悅於人也孟子言此深自閉藏以求親媚於世是鄉愿之行也○集疏曰朱子曰鄉原務為謹愿不欲忤俗以

取容專務徇俗使人無所非刺既不肯做狂又不肯做  
狷一心只要得人說好更不理會自己所見所得與天  
理之是非彼狂者嘐嘐然以古人為志雖行之未至而  
所知亦甚遠矣狷者便只是有志力行不為不善二者  
皆能不顧流俗汙世之是非雖是不得中道却都自是  
為己不為他人彼鄉原反非笑之曰何以是嘐嘐也言  
不顧行行不顧言則曰古之人古之人此是鄉原笑狂  
者也行何為踽踽涼涼生斯世也為斯世也善斯可矣  
此是鄉原笑狷者也彼其實所向則是闇然媚於世而  
已孔子以他心一向外馳更不反己故以為德之賊又  
曰生斯世也為斯世也善斯可矣此是鄉原本情又曰  
鄉原為他做得好便人皆稱之而不知其有無窮之禍  
如五代馮道萬章曰一鄉皆稱原人焉無所往而不為  
者真鄉原也

原人孔子以為德之賊何哉

原亦謹原之稱而孔子以為德之賊故萬章疑之



曰非之無舉也刺之無刺也同乎流俗合乎汙世居之

似忠信行之似廉潔衆皆悅之自以為是而不可與入

堯舜之道故曰德之賊也

呂侍講曰言此等之人欲非之則無可舉欲刺之則無可

刺也流俗者風俗頹靡如水之下流衆莫不然也汙濁也非忠信而似忠信非廉潔而似廉潔孔子曰

惡似而非者惡莠恐其亂苗也惡佞恐其亂義也惡利

口恐其亂信也惡鄭聲恐其亂樂也惡紫恐其亂朱也

惡鄉原恐其亂德也

惡去聲莠音有○孟子又引孔子之言以明之莠似苗之草也佞才

智之稱其言似義而非義也利口多言而不實者也鄭聲淫樂也樂正樂也紫間色朱正色也鄉原不狂不獫

人皆以為善有似乎中道而實非也故恐其亂德

君子反經而已矣經正則庶

民興庶民興斯無邪慝矣

反復也經常也萬世不易之常道也興興起於善也邪慝

如鄉原之屬是也世衰道微大經不正故人人得為異說以濟其私而邪慝並起不可勝正君子於此亦復其常道而已常道既復則民興於善而是非明白無所回互雖有邪慝不足以惑之矣尹氏曰君子取夫狂狷者蓋以狂者志大而可與進道狷者有所不為而可與有為也所惡於鄉原而欲痛絕之者為其似是而非惑人之深也絕之之術無他焉亦曰反經而已矣○集疏曰問反經之說朱子曰經便是大經君臣父子夫婦兄弟朋友五者天下事未有出此其間却煞有曲折使大綱既正則其他節目皆可舉若不先此大綱則其他細碎工夫如何做問經正還只是躬行不及政事曰不可分做兩件說只政事便從這裏做出又曰孟子論鄉原亂

德之害而卒以君子反經為說此所謂上策莫如自治者況異端邪說日增月益其出無窮近年尤甚蓋有不可勝排者惟吾學既明則彼自滅熄耳○孟子曰由堯此學者所當勉而不可以外求者也

舜至於湯五百有餘歲若禹臯陶則見而知之若湯則

聞而知之

趙氏曰五百歲而聖人出天道之常然亦有遲速不能正五百年故言有餘也尹氏曰知

謂知其道也

由湯至於文王五百有餘歲若伊尹萊朱則見

而知之若文王則聞而知之

趙氏曰萊朱湯賢臣或曰即仲虺也為湯左相

文王至於孔子五百有餘歲若太公望散宜生則見而

知之若孔子則聞而知之

散素亶反○散氏宜生名文王賢臣也子貢曰文武之道

未墜於地。在人賢者識其大者。不賢者識其小者。莫不由不有文武之道焉。夫子焉不學此。所謂聞而知之也。

孔子而來。至於今。百有餘歲。去聖人之世。若此其未遠也。近聖人之居。若此其甚也。然而無有乎爾。則亦無有

乎爾。


林氏曰：孟子言孔子至今時未遠。鄒魯相去又近。然而已無有見而知之者矣。則五百餘歲之後。又

豈復有聞而知之者乎？愚按此言雖若不敢自謂已得其傳。而憂後世遂失其傳。然乃所以自見其有不得辭者。而又以見夫天理民彝不可泯滅。百世之下必將有神會而心得之者耳。故於篇終歷序羣聖之統而終之。以此所以明其傳之有在。而又以俟後聖於無窮也。其指深哉。○有宋元豐八年。河南程顥伯淳卒。潞公文彥博題其墓曰：明道先生。而其弟頤正叔序之曰：周公沒。聖人之道不行。孟軻死。聖人之學不傳。道不行百世無

善治學不傳千載無真儒無善治士猶得以明夫善治之道以淑諸人以傳諸後無真儒則天下貿貿焉莫知所之人欲肆而天理滅矣先生生乎千四百年之後得不傳之學於遺經以興起斯文為已任辨異端闢邪說使聖人之道煥然復明於世蓋自孟子之後一人而已然學者於道不知所向則孰知斯人之為功不知所至則孰知斯名之稱情也哉○集疏曰問然而無有乎爾則亦無有乎爾朱子曰惟三山林少穎說得最好若禹臯陶則見而知之若湯則聞而知之蓋曰若非前面見而知得後之人如何聞而知之也孟子去孔子之世如此其未遠近聖人之居如此其甚然而已無有見而知之者則五百歲之後又豈復有聞而知之者乎或問此章之說曰禹臯陶之徒本皆名世之士伊尹太公又湯丈之師非必見其君而後知之也至於湯文孔子又或生知之聖亦非必聞前聖之道而後得之也此而曰見而知之聞而知之者蓋以同時言之則斯道之統臣當

以君為主以異世言之則斯道之傳後聖當以前聖為師學者不以辭害意焉可也至於章末二句則孟子之致意深矣觀其所謂然而無有乎爾則雖若託於不居而其自任之實可見觀其所謂則亦無有乎爾則雖若歎其將絕而所以啓夫萬世無窮之傳者又未嘗不在於斯也學者誠能深考其言而自得之則古人雖遠而其志意之所存者蓋無以異乎日相與言而授受於一堂之上也故愚於此竊以程子繫之焉後之君子其必將慨然有感於斯者夫洎有宋慶元六年朱子熹仲晦卒門人黃榦撰行狀有曰竊聞道之正統待人而後傳自周以來任傳道之責得統之正者不過數人而能使斯道章章較著者一二人而止耳由孔子而後曾子子思繼其微至孟子而始著由孟子而後周程張子繼其絕至朱子而始著蓋千有餘年間孔孟之徒所以推明是道者既已煨燼殘闕離析穿鑿而微言幾絕矣周程張子崛起於斯文湮塞之餘人心蠹壞之後扶持植立

厥功偉然未及百年踳駁尤甚朱子出而自周以來聖賢相傳之道一旦豁然如大明中天昭晰呈露則撫其言行又可略歟



孟子集疏卷十四



跋

杭聞之先師曰論孟二書孔門傳授心法是古之學者其始即此以為學其卒非離此以為道窮理盡性修己治人內外一致蓋取諸此而已噫天何言哉四時行焉百物生焉天何言哉聖人盛德大業日新而富有其存神過化固有在言語之外者子貢所謂夫子之言性與天道不可得而聞者此也至若語之而不惰於吾言無所不說非顏氏子其誰能之故自曾子之徒會集以為

論語孟氏傳得其宗著書七篇有以廣其所未發以此見聖人之精蘊與天地相為無窮非大賢成德何足以蠡測而管窺之哉自漢以來及我有宋訓釋論孟凡幾家求其得聖賢之意蓋鮮天不愛道濂溪周子生焉為民先覺絕學賴以復續再傳而得河南二程子然後孔孟之教復明其書稍稍尊信於世迨及紫陽朱子汭流沂源集諸儒之大成洞四書之蘊與天下學者翕然宗之若論孟二書則有集義以發其所疑有或問以別其

所異於是盡平生之力兼衆說之長而集註出焉蓋至  
於今家傳人誦學者有所標的其羽翼斯文之功顧不  
大歟噫朱子之心即周程之心孔孟之心能言者不可  
復加矣抗之王父西山府君在師門最久朱子固以老  
友稱之嘗引以自匹則曰翁季二書之會粹也取舍決  
擇與有聞焉先伯父節齋府君先君子九峰府君克世  
師學易簣不離左右得於問辨講明為尤詳先君子謂  
抗兄弟曰學二書者求諸集註固也集註氣象涵蓄語

意精密至引而不發尤未易讀嘗欲取集義或問及張  
呂諸賢門人高第往復問答如朱子所謂蒐輯條流附  
益諸說者類聚縷析期於語脉分明宗旨端的而已不  
幸賣志以往嘉熙己亥杭需次家食伯氏覺軒相與語  
及過庭舊聞慨然旁搜博取以就先志越明年重罹陟  
屺之戚廬墓東原對牀讀禮之暇益繙閱諸書參伍考  
訂至忘寢食伯氏不以杭無似俾共商確焉朝夕玩味  
稽合蓋亦有年杭以隨牒四方不獲執筆硯從伯氏卒

業歲在丙午備員冊府伯氏以書誨杭曰集疏成編今九年矣吾未敢脫藁尚冀有進試為我序所以會集之意杭聞伯氏究心於是也參或問以見同異采集義以備缺遺文集則以剖決而無隱語錄則以講辨而益精以至兩世之所見聞門人之所敷繹有足以發越朱子言外之意及推廣其餘說者會而通之間以評論附焉故觀集疏者集註之意易見觀集註者論孟之指益明恍如侍席於竹林精舍間雖千載猶一日也然則集疏

之作有助於學者不既多乎抑先君子有言書之成也不易讀其書者可以易而得之乎不敢僭書篇端姑述其槩于後與同志共之是年九月朔旦弟宣教郎秘書省校書郎兼樞密院編修官兼諸王宮大小學教授杭謹識